

Korint Kimbi 1

Polnõη Korint yeηgõra Kimbi mutukηi alõk.

Jim-asa-asari

Polnõη misin nup memba lilikõiga indimηi yahõt ahõi Grik siti Korint miangõreη anõk. Korint mi Akaia prowinsgõ siti bohonηi. Miangõ kõsohotηi mi (Apo 18.1-6) eka oyoηme. Nalõ miangõreη Korint mi siti keta bõlõkηi. Bisnisηini kõnaηi kõnaηi gwõtputuk ala meget. Korint yeηõn tandõ lopioη aka bem kõnaηi kõnaηi waikηini memba möpõseiba malget. Mõnahotηini kõnaηi kõnaηi ala sõngaiget. Gwõtputukηan serowilin aka malget.

Kimbi ki kewõgõra ohoyõk: Polnõη misin nup memba lilikõiga indimηi karõbut ahõi Efesus sitinõη maliga tosatηan Korintnõhõk kaba sutηine lõmbõt asuhuyõhi, miangõ buzupηi jigetka mõrõk. Lõmbõt tosatηi kewõ: Urumeleη kambu yeηõn deηda simbisebel malget (1.10–4.21), serowilin laη aket (5.1-13), awanõm malmalgõ kõnaηan sohayõk (Boη 7), tandõ lopioηgõ bau nenegõ goranora aket (Boη 8), semõn tõrõηi nenegõ eηololoη aket (11.17-34), zioz malmalgõ areη qahõ wuatangõba ilingõsõη malget, kantri tosatηangõ keuηi keuηi aongit aka jiget (12-14). Tosatηan keu kewõ jiget: “Kõmugeri, yeηõn kunbuk qahõ wahõtme.” (15.12-33) Korint yeηõn kimbi kun mewõyõk ohogetka Polgõreη kayõhi, miangõreη

qeqesi tosatnji al wanjiget, (mi 7.1; 8.1; 12.1; 16.1 mianjörenj oyoŋman).

Polnön qeqesinjini mi melenja lömbötŋinanjögö qambaŋ keu enjiba kimbi ki ohoyök. Urukalemgö keu (Boŋ 13 mi qetpuk sorokŋi. Könanjep nanŋak Korint anda enjekmamgö keunji jiba ohoyök (16.5-7).

Buk kianjögö bahönji bohonji 8 mi kewö:

Jim-asa-asari keu 1.1-9

Denja kambunji kambunji malget 1.10-4.21

Serowilin aka awanöm malmal 5.1-7.40

Urumelenjögö aka urumelenjögö kopa malmal 8.1-11.1

Urumelenj malmal aka möpömöpösei arenj 11.2-14.40

Kraist aka körek neŋön kömupnöhök wahötŋin 15.1-58

Judia urumelenj kambu yenjögöra naluk alget 16.1-4

Polgö arenji aka yaizözkök keunji tetekönji 16.5-24

¹ Kraist Jisösnönj Pol ni noholiga Anutugö jitŋanjögö dop melaimelai azi aposol akzal. Nönön urumelenj alani Sostenes yambuk tatzit.

² *Anutugörenj könagesö Korint sitinönj maljei, nönön embuk Buŋa keu eraum mötŋingöra kazal. Kraist Jisösnönj injini enjgoholiga yambuk qekötahögetka tök kutum enjiiga sarakŋi akze. Mewöyök ambazip denike yenjönj gölme dop Kembunini Jisös Kraistkö qetŋi qeta köulukögetka i aka nini mohok kembu ak neŋgimakzawi, mönö körek enjögöra Buŋa Kimbi ki ohozit.

* 1:2: Apo 18.1

³ Anutu Iwinini aka Kambu Jisös Kraist yetkön mönö kalem möriam engiyohotka luainöŋ malme. Mewö.

Polnöŋ Korint yeŋgöra Anutu kewö möpöseiza:

⁴ Inini Kraist Jisösbuk qekötahöba kingetka Anutunöŋ kalem möriamŋi engiyöhi, miangöra mönö nalö dop engöra Anutuni saiwap jiba möpöseimakzal.

⁵ Inini Kraistpuk qekötahöba kingetka nup memegö mötmöt kalemŋi kelenmaleleŋ engiiga mötmöt könaŋi könaŋi buŋa qem aŋguba ölop Buŋa keugö könaŋi pakpak jimakze.

⁶ Nini Kraistkö könaŋi naŋgöba jiinga keu miangö ölnan ahuba köhöii kinjeangö dop mötmöt kalem pakpak mi engiyök. Miangöra Anutu möpöseimakzal.

⁷ Miangöra nup memegö mötmöt kalem kungöra qahö osiba kinda Kembunini Jisös Kraistnöŋ kumbuk asuhumapköra mambörakze.

⁸ Kembunini Jisös Kraistnöŋ mem köhöim engiiga nalö teteköŋe aukŋe asuhumawi, nalö miangören inini solanŋi aka keuŋini qahö kinda i ekŋe.

⁹ Anutunöŋ keuŋi törörök wuatangöba bauköm engimakŋa. Yaŋön inini nanŋi Nahönŋi Jisös Kraist Kembuninambuk toroqeba malmegöra engoholök. Mewö.

Könagesöŋinan denŋa kambuŋi kambuŋi ala kinje.

¹⁰ O urumeleŋ alaurupni, nöŋön Kembunini Jisös Kraistkö qetŋe kewö uru kuŋgum engizal: Inini mönö körekŋanök urumohot aka sutŋine jujul kude aka malmemö, uruŋini mindirigetka mohot aiga mötmöt mohot wuatangöba malme.

11 O urumelen alaurupni, injini sutnjine anğururuk gwötpuk aka maljei, miangö buzup keunji ambi Kloegö saiwaurup tosatñan mönö jigetka möral.

12 *Kewögöra mi jizal: Engöreñök tosatñan kewö jimakze, “Neñön Polgö keunji wuatangömakzin.” Tosatñan “Neñön Apolosgö keunji wuatangömakzin,” jimakze. Toroqeba tosatñan kewö jimakze, “Neñön Pitögö keunji wuatangömakzin.” Dumñe kunbuk tosatñan kewö jimakze, “Neñön mönö Kraistkö keunji wuatangömakzin.”

13 Kraistnöñ jula gwötpuk ahök me? Pol nöñön mönö engöra aka maripomnöñ kömuyal me? Pol nöngö qetne o melun mem engiget me? Mewö möt sohobepuk?

14 *Nöñön engöreñök Gaius aka Krispus o melun mem etkialmö, tosatñi mi qahö mem engialangöra “Anutu saiwap!” jizal.

15 Miangöra “Polgö qetñe o melun mem nengiget,” kunñan keu omanji mewö jibapuk.

16 *O ölña, Stefanas aka yañgö saiwaurupñi mi mewöyök o melun mem engialmö, yengö andöñine kun o melun mem wanğial me qahöpto, mi törörök qahö mötzal.

17 Kraistnöñ ni ambazip o melun mem engimangöra aka qahö melaim niñgiyökmö, Ölöwak Buña jim sehimangöra jiiga anda kamakzal. Kraistnöñ neñgöra aka maripomnöñ kömuyöhi, nup miangö ösumñan eta omanji akapuk. Miangöra

* 1:12: Apo 18.24 * 1:14: Apo 18.8; 19.29; Rom 16.23 * 1:16: 1 Kor 16.15

Buᅇa keu mi gölme azigö mötkutukutu qakᅇe laᅇ qahö jimakzal. Mewö.

Kraistnöᅇ Anutugö kukösumᅇi aka mötmöt areᅇi indelök.

¹⁸ Ambazip köᅇöp siagö buᅇaya akᅇei, yeᅇön maripomᅇaᅇgö Buᅇa keuᅇi möta mianᅇgöra mötket uruqahö keuya akza. Mewö akzapmö, Suepkö buᅇaya akzini, neᅇgöra keu mianᅇön mönö Anutugö kukösumᅇi indeli mörakzin.

¹⁹ *Mianᅇgö keuᅇi Buᅇa Kimbinöᅇ kewö ohoget ahöza,

“Nöᅇön mötmöt ambazip mötkutukutuᅇini köᅇdeᅇbiga sohoma.

‘Möt asarim yakömakzin,’ jimakzei, yeᅇgö mötmötᅇiᅇi mönö mem sohobiga söroᅇrauba omaᅇi akᅇa.”

²⁰ *Mötkutukutu ambazip öᅇᅇi mi denike malje? Buk oyoᅇda mötmötkö köᅇaᅇi miwikᅇaigeri, mi denike? Göᅇmenöᅇ jitnakölikö böhi aka keu melenᅇqelenᅇda jimakzei, mi mönö öᅇᅇa qetpuk akze me? Göᅇmenöᅇ mötkutukutu ketᅇi ahözawi, Anutunöᅇ mönö mi mem kaheiiᅇa (sahahaiiᅇa) uruqahö mötmöra akza. Keu mi öᅇᅇa.

²¹ Anutunöᅇ nanᅇi mötkutukutuᅇaᅇgö dop göᅇmenöᅇ malmalgö areᅇi alökmö, ambazipnöᅇ nanᅇiᅇi mötkutukutuᅇiᅇe nanᅇöba mewö mianᅇön Anutugö köᅇaᅇi möt kutubingö osiba töᅇpin malget. Osiba mala Kraistnöᅇ maripomnöᅇ köᅇmuyöhi, mianᅇgöra “Uruqahö keuya!” jiba mötketmö, Anutunöᅇ Buᅇa keu mi neᅇön jim

* **1:19:** Ais 29.14 * **1:20:** Job 12.17; Ais 19.12; 33.18; 44.25

sehiringöra jiyök. Mi jim asariinga denike yeñön uruñini melenđa möt narizei, mi dom-amöt qem enjimamgö möri dop kölök.

²² Juda yeñön aiwesök anğöletot asuhumegöra kapañ kölakzemö, Grik kantri yeñön mötkutukutuñinan sehimapköra jarumakze.

²³ Mi jarumakzemö, neñön Kraist maripomnöñ qeget kömuyöhañgö Buña keuñi jim sehimakzin. Juda yeñön keu mi mötketka uruñini bölüiga mianğöreñ qaköba uruñini qahö melenmakze. Kian kantri yeñön mianğöra mötketka uruqahö keuya akza.

²⁴ Gwötpukñan mewö mötzemö, Anutunöñ neñgoholi urunini melenñini, neñgöra Kraistnöñ mönö Anutugö mötkutukutuñi indela Anutugö kukösumñi neñgimakza. Juda me kantri tosatñi akzini, mi töndup Kraistpuk qekötahöba kinda mohot akzin.

²⁵ Ambazip neñgö mötkutukutunini aka ösumnini mi eretñi. Anutunöñ uruqahö akawak, mi-añön mönö töndup ambazip mötkutukutunini onğita öngöñgöñi ketañi akawak. Anutunöñ lölöwöröñi akawak, mi-añön mönö töndup ambazip ösumnini onğita köhöikñi kötökñi akawak.

²⁶ Urumelen alaurupni, nanñini könañini denöwö ahöiga Anutunöñ enğoholöhi, mi mötmöriget? Inñini gwötpukñan gölmegö mötkutukutu ketañi qahö memba malget. Gwötpukñan kukösum qakñe sukinapñinambuk qahö malget. Iwiurupñini gwötpukñan qetbuñañinambuk qahö malget.

²⁷ Mewö qahöpmö, gölme ambazipnöñ enğöra mötketka uruqahö ambazip omanñi akzei, Anu-

tunöŋ mönö inini mewöŋi möwölöhöm enġiyök. Gölmegö mötmöt ambazip ipŋi mi gamu qem enġiyök. Gölmegö ambazipnöŋ enġöra mötketka lölöwöröŋi akzei, Anutunöŋ mönö inini mewöŋi möwölöhöm enġiyök. Gölmegö kukösum ambazip ipŋi mi gamu qem enġiyök.

²⁸ Gölmegö ambazipnöŋ jijiwilit ak enġiba könaŋinaġöra mötketka etqegeŋi akzei, Anutunöŋ mönö inini mewöŋi möwölöhöm enġiyök. Gölmegö yuai akzei, yeŋgö qetbuŋaŋini mem solanii qahöwakŋapköra yuai kun qahö akzei, mönö mi möwölöhöm enġiyök.

²⁹ Kunöŋ Anutugö jemesoholŋe silenġi memba öŋgöbapüköra mönö mewö meköba möwölöhöm enġiyök.

³⁰ Anutunöŋ nam köl enġiba enġuanġiriga Kraist Jisösbuk qekötahöba mal köhöimakze. Yaŋön Anutugö mötkutukutuŋi qainŋi kun indeli mörakzin. Kraistnöŋ sohopeni memba keunini jim teköi solaniba maljin aka tök kutum neŋgiiga sarakŋi akzin.

³¹ *Buŋa Kimbinöŋ keu kewö ohoget ahöza, “Kunŋan silenġi memba öŋgömawi, yaŋön mönö Kembu möt waŋgizawaŋgöra aka silenġi mem öŋgöma.” Keu miangö dop ahinga dop kölma. Mewö.

2

Kraist maripomnöŋ kömuyöhaŋgö keuŋi jial.

¹ Urumelen alaurupni, nöŋön enġöreŋ kaba Anutugö könaŋi naŋgöba jim asarim enġiali, mi keuni nahöm sorokŋambuk akŋapköra qahö jiba

* 1:31: Jer 9.24

malal me gölmegö mötkutukutu öngöngöñi kondela mianjön sileni qahö memba öngöba malal.

² Nöñön engö sutñine mötmöt murutñi pakpak görañe ala Jisös Kraistkö keuñi aka maripomnöñ kömuyöhañgö könañi miyök möt kutuba mi jim sehimamgö keu jöhöyal.

³ *Keu mewö jöhöba engöreñ kayali, nalö miangöreñ azi lölöwöröñi aka jönömni gwötpuk undui kenğöt qakñe malal.

⁴ Nöñön Buña keu jim asarim engiali, mi mötkutukutu ketanañgö kelök keuñi qahö jiba malal. Mi qahöpmö, Uña Töröñan sölölohöm engii ösum-mumuñan uruñine inahömapköra kapañ köla jiba malal.

⁵ Gölme ambazipkö mötkutukutuñinan qahöpmö, Anutugö kukösumñan nam köl engiiga möt narimegöra kapañ köla malal. Mewö.

Uña Töröñangö mötkutukutu mi qainñi kun.

⁶ Nöñön töndup urumelen alaurup aködamunñinambuk maljei, yengö sutñine tatpiga Anutugö mötkutukutuñi gegeni mi ölop eraum mörakzin. Gölmegö mötkutukutuñi mi qahö eraum mörakzin. Gölmeñi gölmeñi galöm köl engiba malgetka kukösumñinan qahöwakañawi, yengö mötkutukutuñini mi mewöyök qahö eraum mörakzin.

⁷ Mi qahöpmö, Anutugö mötkutukutu tölapñi mönö mi eraum mörakzin. Anutunöñ Suep gölme qahö miwikñaim etkiiga miangöreñ mönöwök qeljiñe lök areñi kewö ala jöhöyök, “Ambazipnöñ bian ahuba aködamun miwikñaiba oyaenköyaen

* 2:3: Apo 18.9

akneğöra mönö mötkutukutuni qainņi kun mi enğimam.” Mewö jiba tölapņe ali ahöyök.

⁸ Gölmegö azi kembuņi kembuņi mala kotkeri, yeņgöreņök kunņan mönö mötkutukutu mi qahö möt kutuyök. Mi möt kutubeak ewö, Kembunini asakmararaņambuk i mönö maripomnöņ qahö qegetka kömumbawak.

⁹ *Mötkutukutu qainņi kun miangöra keu kewö ohoget ahöza,

“Kunņan yuai mi je kezapņan qahö eka mörök.

Miangö mötmötņan kungö uruņe qahö asuhui mörökmö, ambazip Anutu uruņinan jöpaköm waņgimakzei, yeņgöra mi mönö mözözömgöiga jöjöröba ahöza.”

¹⁰ Göłme ambazip yuai mi qahö möta jipjap malgetmö, Anutunöņ mi mönö Uņaņi melaiiga neņgöra indeli mörin. Yaņön keu pakpakö könaņi jaruba miwikņaimakza. Anutugö mötmöt gegeņi mewöyök möt teközawaņön mönö mi sölölöhöm neņgiiga mörin.

¹¹ Kungö uruņi kunöņ qahö mötza. Uruņaņgö uņaņi yaņönök mönö mi möt yaköza. Mewöņanök Anutugö uruņi mi kunņan qahö mötzapmö, Anutu nanņi Uņaņi Töröņi yaņönök mi möt yaköza.

¹² Neņön gölmegö ahakmeme bölöņaņgö ömeņi kun qahö buņa qem aņguinmö, Anutunöņ yuai kalem neņgiyöhi, miangö könaņi mötpingöra mönö nanņi Uņaņi melaii urunine geiga maljin.

¹³ Miangö könaņi gegeņi tokoba eraum mörakzin. Göłme ambazipnöņ mötkutukutuņaņgö qakņe keu kusum neņgigetka miangö dop mi qahö eraum

* **2:9:** Ais 64.4

mörakzin. Mewö qahöpmö, Uña Töröñan keu kusum neñgiyöhi, mianğö dop mönö urugö keu ölni kewöringa sölölohöm neñgii jim asarimakzin.

¹⁴ Uña Töröñan sölölohöm neñgiiga keu mi mewö kewöztin ewö, könañi mönö miwikñaiba möt asaribinağö dop akza. Mianğöra Uña Töröñan denike yeğö uruñine qahö mali öne lañ maljei, yeñön Anutu Uñañanğö buñañi mi möt anğön kölbinağö osimakze. Yeñön Buña mianğöra mötketka uruqahö keu tandök aiga könañi möt asaribinağö osize.

¹⁵ Yeñön osizemö, Uña Töröñan sölölohöm neñgiza ewö, mönö keu pakpakö könañi kewöta jim teköbinağö dop akzin. Mewö akzinmö, urumelen ambazip kungö könañamñi mi gölme ambazip körekñan törörök jim teköbinağö osimakze.

¹⁶ *Mianğö könañi mi Buña Kimbinöñ kewö ohoget ahöza,
 “Kembugö urumötmötñi mi azi kunñan kun qahö mörök.
 Mianğöra kunñan i goro qambañ wañgimawağö dop qahö.”

Kunñan mi qahö mörökmö, neñön Kraistkö urumötmötñi memba maljin. Mewö.

3

Anutugö nup meme ambazip

¹ O urumelen alaurupni, injini namande ewö Kraistpuk qekötahöba kinget. Mianğöra nöñön injini gölmegö ahakmeme mötöteimakzeañğö tandök malgetka Buña keu mi jim asarim enğiba sutñine malal. Uña Töröñan sölölohöm enğii

* 2:16: Ais 40.13

maljeangö tandök ewö engöra jimangö osiba malal.

²*Nöjön keu möt asarimeangö dop juzu onji ewö gumohom engiba malal. Nene ölni nembangö dop qahö akerangöra keu gegenji mi qahö engial. Nalö miangöreñ nene ölni nembangö osiget aka nalö kewöñe mewöyök mi ölop qahö nemakze.

³ Inini toroqeba gölmegö ahakmeme bölöñi mötöteiba malje. Inini urunöñ mututqutut möta angururuk aka keu jijinöñ nonjgitnöñ gongitpi ahakze. Mewö aketka uru silegö sihim kömbönañini bölöñan galöm köl engiiga urumelengö kopa ambazip omanji yengö tandök ahakze.

⁴*Tosatñi inini kewö jimakze, “Nini Polgö keunji wuatangömakzin.” Tosatñan kewö jimakze, “Nini Apolosgö keunji wuatangömakzin.” Mewö mewö jiba mönö gölme ambazip omanjan ahakzeangö tandök aka malje.

⁵ Apolosnöñ ninjia akza aka Pol nöjön ninjia akzal? Niri mönö Anutugö nuwa memba maljit. Kembunöñ nanjik nanjik netköra nup netkiyöhi, miangö dop bauköm engiziga urunjini melenja Kambu möt nariba malje.

⁶*Nöjön kötni kömötpiga Apolosnöñ o memba kaba miangöreñ mokoyökmö, Anutunöñ mönö meiga töhötmöriam asuhuyök.

⁷ Miangöra kömörohi, yanön qetñambuk qahö akza. O mokoyöhi, yanön mewöyök qetñambuk qahö akzapmö, Anutunöñ kötuatköiga töhötmöriamñi kota qarimakzei, yanönök mönö qetbuñambuk akza.

* **3:2:** Hib 5.12-13 * **3:4:** 1 Kor 1.12 * **3:6:** Apo 18.4-11.24-28

⁸ Mewö akzapmö, kömörakzali aka o moko-makzawi, netkôn mönô dop mohot akzit. Mohot akzitmö, mi töndup töwaniri mi mönô nupniri memakzirangö dop nannök nannök membit.

⁹ Netkôn Anutugö nup nejakyahötñi aka yambuk nup memakzit. Engö uruñini mi Anutugö arö ewö aiga kölkömöt nupñi mianğöreñ memakza. Anutunöñ miri ewö uruñini inahöba mindirim enğiiga köhöiba wahörakze.

¹⁰ Anutunöñ kalem möriam niñgiyöhi, nöñön mianğö dop miri memegö mötmöt azi ewö aka Anutugö tandö kömbönañi uruñine kuñguba kömötpiga kunöñ mianğö qakñe miri memakza. Ölep memakzapmö, mohot mohot neñön mirigö nupñi ölepñanök membinangö dop akzin. Ek kutuba membingöra mönô je galöm mem angubin.

¹¹ Urugö tandöñi mi Jisös Kraist. Nöñön mi lök uruñine kömötpiga kunñan mötnaripkö tandö kun miwikñaimangö osima.

¹² Tandö mohot akzapmö, mianğö qakñe tosatñan miriñini goul silwönöñ me köt ölninambuk tosatñi mianğön memakze. Tosatñan miriñini ip kösönöñ, tömbö bohöm sinñan me señgwenöñ memakze. Siliknini mewö me mewö memakzin ewö,

¹³ urugö nupninangö ölnan mönô inannök inannök aukñe asuhuma. Kembunöñ nalöñan kam kuñguiga mianğöreñ mönô mirigö esuñi luluñma. Miri esuninan mönô Anutugö könöp bölamñan asuhuiga jeba eriga ölnan aukñe ekingö dop akña. Könöp mianğön mönô mohot mohot neğö mirininangö tandökñi ölni mi esapesapnöñ ala kewötma.

14 Könöpnöŋ jeba miri pakpak kewöt enŋiiga megetka ölninan köhöiba kinme ewö, yeŋön mönö nupŋinanŋö töwaŋi buŋa qem aŋgume.

15 Tosatŋan miriŋini megetka ölninan jeba etme ewö, yeŋön mönö töwa qahöpmö, geŋmororon mi-wikŋaime. Mi miwikŋaimemö, nanŋinak töndup Suepkö buŋaya malme. Könöp bölamnöŋ jem enŋohoiga mianŋö tandök oŋgitpingö jaram tiba kök alal ewö aketka Anutunöŋ meköm enŋiiga Suepnöŋ öŋgöme.

16 *Nanŋinak Anutugö Buŋa jike (tempöl) aketka Anutugö Uŋaŋan uruŋine maljawi, mi mötze me qahö?

17 Anutugö Buŋa jikeŋi mi kömbukŋi akzawi, mianŋö dop enöŋ sarakŋi akze. Mianŋöra kunŋan Anutugö jike mem böliza ewö, Anutunöŋ mönö i nanŋi mem bölim waŋgima.

18 Kunŋan nanŋi gölmegö mötmötŋi wuatangöba tilipköm aŋgubapuk. Enŋö sutŋine kunŋan nanŋangöra möri “Gölmegö mötkutukutu öŋgöŋgöŋi memba maljal,” jiza ewö, yaŋön mönö mutuk uruqahö aka mewö mianŋön mötkutukutu ölni miwikŋaibawak.

19 *Anutunöŋ gölmegö mötkutukutu öŋgöŋgöŋi mianŋöra möri uruqahö keuya akza. Mianŋö keuŋi Buŋa Kimbinöŋ kewö ohoget ahöza, “Anutunöŋ mötkutukutu öŋgöŋgöŋi memba maljei, mi gwaröhöm enŋiiga nanŋini mötmöt imbi-imbinöŋ supapköba qaköme.”

20 *Mianŋö keuŋi kun kewö ahöza, “Kembunöŋ

* **3:16:** 1 Kor 6.19; 2 Kor 6.16 * **3:19:** Job 5.13 * **3:20:** Sum 94.11

mötkutukutu ambazip yengö mötmöt arenjanğöra möri omanı akza.”

²¹ Mianğöra engöreñök kunjan mönö ambazip neñğöra aka silenı memba wahötpapuk. Körek neñön mönö engö buñaya akzin.

²² Pol, Apolos, Pitö* neñön mönö engö buñaya akzin. Ambazip gölme dop maljini, neñön mönö körek engö buñaya akzin. Mianğöra ölop keu mi me mi kewöta memba mewö mianjön malmalñini malme aka kömupñini kömume. Nalö kewöñe maljini, körek neñön mönö engö buñaya akzin aka könañgep nup meme ambazip malmei, yeñön mönö mewöyök engö buñaya akñe.

²³ Mewö ak engizinmö, eñön Kraistkö buñaya aketka Kraistnöñ Anutugö buñanı akza. Mewö.

4

Nini Kraistkö aposolurupñi akzin.

¹ Mianğöra ambazip körekñan mönö neñğöra kewö mötketka dop kölma: Kraistnöñ jim kutum neñgiiga nupñi memakzin. Anutunöñ keuñi tölapñi neñgiiga buñanini aiga galöm kölakzin. Neñön miri galömñanğö tandök ewö akzin.

² Galöm yengö toñinan miri yuainı galöm kölmegöra böröñine aljawi, yañön mönö keu bohonñi kewö kapan köla jim kutum engimakza, “Nupñini mönö misila pöndañ memba malme. Memburik-qemburik kude akñe. Mewö miwikñaim engibiga dop kölma.”

³ Korint eñön me gölmegö keu jake kungö galömñan ni kewöta jim teköm niñgibeak ewö,

* **3:22:** Pitö qetñi alañi Sifas

nöñön mönö keu miangöra mötpi eretji kötökñi akza. Nanak mewöyök nani keuni qahö jim teközal.

⁴ Uruni kewöta keu kun qahö mötpiga mem lömbörim ningizapmö, miangöra töndup solanni qahö akzal. Ambazipnöñ qahöpmö, Kembunöñ mönö nöñgö keuni kewöta jim teköm ningimakza.

⁵ Miangöra inini mönö nalö kewöñe kungö keunji kun mi kude jim teköme. Kembunöñ nalöñi ali kam kungumapköra mönö mambötme. Mamböta malgetka miangöreñ kaba keu yuai ömukñe asambötket ahözawi, mi mönö asakñan indeliga aukñe asuhuma. Yanñon kaba ambazip urunini mem asariiga könañamnini ölnan aukñe ekñangö dop akña. Könañamnini ölni eka mohot mohot kewöt neñgiiga Anutunöñ mönö miangö dop nalö miangöreñ möpöseim neñgibawak.

⁶ O urumelen alaurupni, inini jula jakbak-örañbörañ aka lañ likeplikep aröñda kinda qetal anğumakze. Mewö malbepuköra mönö Apolos niri mötmörim netkiba nanñini imbi-imbi mosöta keu kianğö könañi mötme, “Buña keu ohoget ahözawi, mi mönö kude oñgitme.” Keu mi mötket uruñine ahöi tem kölgetka ölöwakñegöra mönö kösohotniri mewö ohozal. Mi nani aka Apolos netkö könañamniri kewöta mötmöriba möt asarimegöra ohozal. Jujulñinan mewö teköma.

⁷ Gölmegö kunñan mönö qahö mem letot gihiiga tosatñi eñgoñgita qainñi kun akanak me qahö? Mi qahö. Yuai pakpak ahöm gihizawi, mi mönö Anutunöñ kalem gihiiga buña qem anğunöñ me qahö? Mi kalema buña qem anğunöñ ewö, mönö

wuanöngöra kalem qahöpkö tandök ewö silegi memba öngömakzan? Mi qahö dop kölja.

⁸ Yuai pakpak memba malbingö sihimnji mötzei, mi mönö lök ahöm engim teköza. Anutunöŋ Suep köweŋeyök kalemnji kalemnji mokom enŋiiga lök simbawoŋ akze. Neŋön qahö bauköm enŋiinga nanŋinak töndup mötnaripkö azi kembu tandök akze. Nanŋinaŋgöra mewö mötmörim aŋguze. O eŋön ölŋa kiŋ aketka dop kölbawak. Mewö aketka neŋön mönö mewöyök azi kembu-urupŋini aka enŋö qöhöröŋine ölop silenini memba öngöba aiweliköm aŋgubinak. Nöŋön mewö akingö sihimnji mötzal.

⁹ Nöŋön mewö mötzalmö, nanini könaŋamnini eki tandök kewö akza: Anutunöŋ aposol nini al neŋŋiiga ambazip jeŋine etqeŋeni töhön aka maljin. Ambazip enŋuget kömumegö jim tekögeraŋgö tandök aukŋe anda kainga laŋ qeta gamu qem neŋgimakze. Yuai ehekŋi qainŋi kun ahinga gölme dop mienŋö tonji aka Suep jakenji jakenji mienŋö pom garataŋi mienŋön mönö jeŋinan neŋgek kutuba neŋgehimakze.

¹⁰ Kraistköra aka uruni sohoi maljali, nöngöra mewö jimakzemö, eŋön Kraistpuk kinda mötmöt ambazip aködamunŋinambuk akzeaŋgö tandök akze. Nöŋön lölöwöröŋi akzalmö, eŋön “Ambazip köhöikŋi akzin,” jize. Ambazipnöŋ iŋini göda qem enŋgimakzemö, nöngöra mötket eriga jijiwilit ak niŋgimakze.

¹¹ Nalö dölkewöŋe mewöyök nenegö kömumba ogöra ak neŋŋiiga opo walŋi jujuratŋi löngöta malinga bimmöŋ laŋ neŋgugetka dum mirinini qahö mala toroqeba anda kamakzin.

12 *Nanini böröninan sileqeqe tandök nup memakzin. Ambazipnöḡ laḡ qesuahöm neḡimakzemö, neḡön mönö kötuetköm enḡiba yeḡöra köulukömakzin. Sesewerowero ak neḡimakzemö, neḡön mönö mi möta mökösoḡda kapaj köla maljin.

13 Uruqeqe keu töhöreḡ jim neḡimakzemö, neḡön mönö guḡböḡjöḡjöḡ qakḡe ösoḡnöḡ melenmakzin. Neḡön gölmegö nesak lömḡaḡgö tandök ewö ahinga gölmeḡi gölmeḡi yeḡön sisitnini memba andö qem neḡimakze. Mewö mala kota nalö dölkewöḡe mewö toroqeba maljin.

14 Gamu qem enḡimamgöra keu ki qahö ohozalmö, wölböt nahön böraturupni ewö mönö goro qambaḡ enḡimamgö mötzal.

15 Mötnaripkö böhi 10.000 yeḡön Kraistpuk qekötahöba köyan köla kusum enḡibeak ewö, mi töndup nöḡön mönö Kraist Jisösbuk qekötahöba Ölöwak Buḡa jim asariba iwiḡini akiga uruḡini melenḡet. Miḡgöra iwiurupḡini gwötḡuk qahö malje.

16 *Miḡgöra uruḡini kewö kuḡum enḡizal: Nöḡön silik ahakzali, miḡgö dop enḡön mönö nöḡgö silikni mi wuatḡgöba malme.

17 Nöḡön silikni Kraist Jisösbuk qekötahöba aka memba gölmeḡi gölmeḡi liliköba urumelenḡ könagesö dop kusum enḡimakzali, miḡgöra mönö ölum enḡubapuk. Nöḡön miḡgöra aka wölböt nahöni Timoti melaibiga enḡöreḡ kama. Yaḡön nömbuk pöndaḡ mala Kembubuk qekötahöba kinda kaba könaḡamni jiba köl gulim enḡima.

* 4:12: Apo 18.3 * 4:16: 1 Kor 11.1; Fil 3.17

18 Engörenök tosatñan nöhön engören qahö kabilenjak ewö möta silenini möpöseiba jakbak-öranböran aka lañ malje.

19 Mewö maljemö, Kembunöñ sihimñan ni kamangö mötma ewö, mönö ösumök engören kamam. Kamami, nalö mianğoren jakbak-öranböran ambazip yeğgö kukösumñinangöra qesim engibiga jim miwikñaigetka mötmam. Silenini memba wahöta keu ketanji ketanji lañ jimakzei, mianön nöhğoren eretñi akza.

20 Anutugö bemtohon mi keuyök jijigö yuaia qahöpmö, ölnji mi Anutugö kukösum. Mianön mönö nam köl neğgiza.

21 Mianğöra uruñini qahö melenđa lañ malme ewö, nöhön mönö kömbin memba kaba keunöñ engohotirimam. Uruñini melenme ewö, mönö urubönjöh qakñe urukalem ak engimangöra kamam? Keu yahöt mi kewöta nöhğöra sihimñini denöwö mötzei, mi möt kewöta jime. Mewö.

5

Kunöñ serowilin ahöhi, i mönö sutñineyök közölme.

1 *Keu kun kewö jigetka nöhğö kezapne geyök: Tosatñan urumelen könagesö sutñine serowilin ahakze. Kunñan iwiñangö anömñi memba malja. Serowilin mewöñi mi urumelenğgö kopa ambazip yeğgö sutñine mewöyök kun qahö ahöza.

2 Kunñan mewö aiga inini töndup silenini memba öngöba lañ jakbak-öranböran ahakze. Mi qahö dop köljamö, silikñangö wösöbiriknöh mönö mem

* 5:1: Dut 22.30

kömum enjiiga dop kölbawak. Mewö aka ölop azi siŋgisöndok mewö ahöhi, i mönö sutŋineyök közölgetka yaigep etma. I denöwö aka qahö közöljeje?

³ Nöŋön ölna engöreŋök köröwen malbi sileni qahö nehakzemö, töndup uŋanan mönö embuk maljal. Kunŋan ahakmeme kanjamŋambuk ahöhi, nöŋön lök yangö keuŋi kewöta sutŋine maljalangö tandök möta jim teköba kewö jizal:

⁴ Inini mönö Kembunini Jisösgö qetŋe totoko algetka nöngö uŋanan embuk toroqeiga Kembunini Jisösgö kukösumŋan nam köl enjiiga öröröŋ kinda keuŋi jiba mönö kewö jöhöme:

⁵ Satanöŋ silenangö sihim kömbönaŋi bölöŋi qei etmapköra mönö andö qem waŋgiba yangö böröŋe algetka mindiŋgöm waŋgima. Mindingöm waŋgiiga löwöriba uruŋi meleŋi Anutunöŋ amöt qem waŋgiba Kembangö nalöŋe uŋaŋi meköiga Suepkö buŋaya akawak.

⁶ *Silenini memba öngömakzei, mi ölopŋi qahö. Inini keu yahöt ki möt yaköze, “Yist kitipŋi moröŋi obuk mindiriba plauanöŋ alinga mem qariiga dis kokolak qemakza. Mewöyök bau wösö kömbukŋan tiŋgirakzawi, mianöŋ mönö busu pakpak mem bölimakza.”

⁷ *Keu miangö dop inini lök plaua dis sarakŋi ewö aketmö, siŋgisöndokö yistŋi kun mi ket ewö sutŋine kaŋgota engöhömakza. Körek bölibepuköra mönö yistŋini walŋi mi kewöt uteköme. Azi mi wösö kömbuk ewö közöla mönö dumŋe kunbuk yambu jeŋiqeŋe dölökŋangö plaua dis sarakŋi

* 5:6: Gal 5.9 * 5:7: Eks 12.5

ewö aka malme. Ak-kömukömu kendon nalöŋe lama jöwöwöl ohoba beret yistŋi qahö nemakzei, miangö dop Kraistnönŋ nanine ak-kömukömu lamanini aiga lök qeget kömuyök. Miangöra inini ölop plaua dis sarakŋi yistŋi qahö ewö akŋe aka kunbuk oyaenŋkoyaenŋ uruŋe kaŋgota malme.

⁸*Kraist kömuyöhanŋgöra mönö sösöŋgai kendon aka malbin. Yist me wösö kömbukŋi mi ahakmeme bölöŋi inŋonŋmaŋonŋambuk. Miangö qakŋe mönö sösöŋgai kendon kude akin. Miangöra mönö geŋmonŋ mosöta keu ölni wuatangöba beret yistŋi qahö ewö aka miangö qakŋe sösöŋgai kendon aka malbin.

⁹Nönön Buŋa Kimbi ohom enŋgiba kewö jial: Inini serowilin ahakzei, yembuk mönö kude köisirik tata eraum mötme.

¹⁰Gölmenönŋ uruŋini qahö melenŋa ahakmeme bölöŋi ahakzei, yeŋgöra keu mi qahö ohoyal. Yeŋön serowilin aka yuaigö nepaqepalok membagan membingö köpösöŋgömakze. Yuai kalöpköba yonŋorö memakze aka tandö lopionŋ waikŋini memba möpöseim enŋgimakze. Yeŋgöra aka mewö ohom enŋgibileŋak ewö, inini mönö gölmenönŋ malbingö osibeak.

¹¹Yeŋgöra aka qahöpmö, könanŋi kewögöra keu mi ohom enŋgial: Kunŋan nanŋi qetŋi urumelenŋ ala jiba töndup serowilin akza me yuaigö nepaqepalok membagan memangö kösösöŋgömakza me tandö lopionŋ waikŋi memba möpöseimakzawi, yambuk mönö kude köisirik tata eraum mötme. Mötnarip kambu enŋgö sutŋine kunŋan mepaqepaik ahakza me o köhöikŋi memba

* 5:8: Eks 13.7; Dut 16.3

enololon ahakza me yuai kalöpköba yongorö memakza ewö, yambuk tata nene kun kude neme.

¹² Yaigep maljei, nöñön yengö keuñini qahö jim tekömakzal. Mi nöñgöreñ nuwa qahö. Injini mewöyök könagesö pakpakö keuñini qahöpmö, uruñini melenđa sel uruñe maljei, mönö yengö keuñini miyök kewöta jim tekömakze.

¹³ *Yaigep lañ maljei, Anutunöñ mönö yengö keuñini kewöta jim teköma. Mianğöra mönö Buña keu kianğö dop akñe, “Azi bölöñi mi mönö sutñineyök közölme.” Mewö.

6

Urumelen alañini mi yaigep yengö keu jakeñe kude alme.

¹ Urumelen ambazip sutñine kunñan alañi keu jakeñe almamgö mötza ewö, yañön Anutugö ambazip sarakñi engongita ambazip gongonji yengö jeñine aniga qahö dop kölja. Qahö! Urumelengö kopa ambazip bauköm wanğimeğöra qesim enğiiga gamuñambuk akza.

² Anutugö ambazip sarakñi neñön kantriñi kantriñi yengö keuñini kewöta jim teköbini, mi lök mötze. Injini gölme pakpak yengö keuñini jim teköbingö dop akze ewö, mönö denöwö aka keu morömorö kewöta jim tekömeangö dop qahö akze? Injini mönö ölna mianğö dop akze.

³ Urumelen ambazip neñön Suep garataurup yengö keuñini kewöta jim teköbini, mi lök mötze. Mianğö dop akzin ewö, gölmenöñ malmalgö keuñi mi mönö amqeba kewöta ölop jim tekömakin.

* 5:13: Dut 13.5; 17.7

⁴ Mianğöra gölmenöŋ malmalgö keuŋi sutŋine asuhumakzawi, keuŋini mi mönö wuanöngöra silenŋe yenğö keu jakenŋe öngöba jim tekömegö qesim engimakze? Urumelenğö kopa ambazip sutŋine jijiwilit ak engimakzei, yenğöra töndup keu nalöŋe mötketka öngömakza. Mi qahö dop kölja.

⁵ Keu mi gamu qem engimamğöra jizal. Mötnarip ambazip engö sutŋine keu ahözawi, engörenök kungö mötkutukutuŋi dop köliga keu mi ölop jim tekömawanğö dop akza me qahö? Mönö ölop sutŋineyök azi mewöŋi miwikŋaime.

⁶ Qahö tandök aiga urumelen ala kunöŋ alanŋi silenŋe yenğö keu jakenŋe alakza. Mewö ala ambazip Anutu qahö möt narizei, mönö yenğö jenŋine anda keu nupköra qesim engimakza. Mi qahö dop kölja.

⁷ Sutŋine keu jakenŋe al angumakzei, mewö mianjön mönö nanŋini eta enguiga Kraistkö qetbunajan lök eretŋi aiga malje. Ambazipnöŋ ak bölim engigetka uruŋini mianğöra wahöri keunöŋ al engigetka Anutugö jeŋe qahö dop kölja. Tilipqilip aka yuainŋini öröba megetka inŋini likepŋi qahö melenŋ engigetka mewö mianjön Kraistkö könanan mönö aködamunŋambuk akŋa.

⁸ Inŋini Kraistkö qetŋi kewö mem bölimakze: Mönö nanŋinak tilipqilip aka ambazip ak bölim engiba yuainŋini öröba memakze. Urumelenŋ alauruŋini yenğöra mewöyök mewö ak engimakze.

⁹ Irimqirim ambazip yeŋön mönö Anutu bemtohonanğö uruŋe öngöba dum qahö meme. Mi mötze. Ahakmemenjanan mönö tilipköm anguba janjuŋ akepek. Tosatŋan serowilin aka tandö lopionŋ waikŋini memba möpöseimakze. Tosatŋan awanöm

malmal ongita qesabulum ahakze. Tosatjan monengöra laj amimba malje aka azi nanjirök ambi nanjirök amimba malje. Mewöni mienön mönö Anutu bemtohonangö buñani qahö akñe.

¹⁰ Tosatjan yongorö memba yuaigö nepaqepalok membagun membingö köpösöngömakze. Tosatjan o köhöikñi namba enjololöñ aka laj mepaqepaik ahakze. Tosatjan yuai kalöpköba yongorö memakze. Ambazip mewöñan mönö Anutugö bemtohoñi buña qahö qem anjume.

¹¹ Engöreñök tosatjan mutuk mewö aka malgetmö, könanjep Kembunini Jisös Kraist buña qem anjugetka sepñan sanjoñda tök kutum engiba yangö qetñe sarakñi aket. Mem solanim engiiga Anutuniñangö Uñanjan mönö inahöm engiiga dingiba malje. Mewö.

Sileninan Anutugö jike kömbukñi akza.

¹² *Nöñön yuai pakpak ölop memamanjö dop akzalmö, yuai pakpaknöñ mönö qahö mem ölöwak niñgiza. Yuai pakpak ölop memamanjö dop akzalmö, yuai kunöñ kembu ak niñgibapuköra mönö galöm mem anjumakzal.

¹³ “Nene mi neneyök. Mi kömoñgokninangöra aka ahöza. Kömoñgoknini mi nene nein gemapköra aka ahöza.” Kunöñ mewö jibawakmö, Anutunöñ mönö nene aka kömoñgok mi mohotñe jim teköi qahöwakñahot. Silenini mi serowilin akingöra qahöpmö, Kembugö nupñi membingöra aka ahöza. Mewö ahöiga nanñak silenini ölöwakñapköra nene yuai neñgimakza.

* **6:12:** 1 Kor 10.23

14 Anutunöŋ nanŋi kukösumŋan Kambu mem gulii kömupnöhök wahöröhi, yaŋön mönö nini mewöyök mem gulim neŋgii wahötpin.

15 Engö sileninan Kraistpuk toroqeba silenangö kitipŋi akzei, mi mötze me qahö? Miangöra nöŋön Kraist silenangö kitipŋi kun memba köna ketanŋi ambibuk qekötahömam me qahö? Mi qahöpmahöp! Mönö yapmakek!

16 *Anutunöŋ keuŋi kewö jii ahöza, “Yetkön mönö sile mohot akŋahot.” Miangöra kunŋan köna ketanŋi ambibuk qekötahözawi, yaŋön mönö yambuk sile mohot akŋahot. Mi mötze me qahö?

17 Mohot akŋahotmö, kunŋan Kembubuk qekötahözawi, yaŋö uŋaŋan mönö Kembugö Uŋaŋambuk mindiriiga mohok aka malmahot.

18 Serowilin mi mönö misiŋgöba mosötme. Siŋgisöndok tosatŋi mi me mi ahakzini, mi pakpak mönö sileninanangö yaigepŋe asuhumakza. Kunŋan serowilin ahakzawi, yaŋön mönö nanŋi silenŋi mem böliba siŋgisöndok ahakza.

19 *Sileninan mönö Uŋa Töröŋangö Buŋa jikenŋi (tempöl) akza. Anutunöŋ Uŋaŋi enŋiiga buŋa qem angugetka uruŋine malja. Miangöra nanŋini buŋaya qahö akzei, mi mötze me qahö?

20 Nanŋini buŋaya qahöpmö, Kraistnöŋ söngöröŋini ketanŋan bohonŋini meiga yaŋö buŋaya akze. Miangöra sileninan mönö ahakmeme sarakŋi aketka Anutugö qetbuŋaŋan sehimakŋa. Mewö.

* 6:16: Jen 2.24 * 6:19: 1 Kor 3.16; 2 Kor 6.16

7

Awanöm aka gwabö seram malmal tatat

¹ Inini keu tosatni ohoba qesigeri, mi jim asarimam. Azinöŋ ambi qahö memba gwaböya maljawi, mi ölop.

² Mi ölopŋi akzapmö, silegö sihimŋan sero yonŋorö akepuköra inini mohot mohot mönö nanŋik nanŋik awanöm amemba malme.

³ Azinöŋ mönö anömŋanŋö sihimŋanŋö dop awanöm malmalgö areŋi wuatangöma. Anömŋan mewöyök mönö apŋanŋö sihimŋi wuatangöba malma.

⁴ Anömŋanŋö silenŋan mönö nanŋi buŋaŋi qahö aiga nanŋök mi qahö galöm kölakzapmö, apŋan mi galöm kölakza. Apŋanŋö silenŋan mewöyök nanŋi buŋaya qahö aiga nanŋanök qahö galöm kölakzapmö, anömŋan mi galöm kölakza.

⁵ Mianŋöra nanŋiri mönö kude anŋön köl anŋuba malmahot. Nanŋirök urumohot aka pöndaŋ köuluk nup membitköra ölop nanŋök nanŋök malmahotmö, nalö tosatni mewö malagun mönö kumbuk mindiriba mohotŋe malmahot. Uruŋiri ölop qahö galöm kölohotka Satanöŋ esapköm etkiiga siŋgisöndoknöŋ etpahotpuköra mönö mewö aka malmahot.

⁶ Mewö akŋahotköra ölop jizalmö, jöjöpäŋ keu mewöŋi mi qahö al enŋizal.

⁷ Nöŋön ambazip körek pakpak ni ewö gwabulum malmegöra mötzalmö, inini tosatni Anutugö nup memegöra mötmöt kalem mewöŋi mi qahö memba malje. Anutunöŋ mötmöt kalemŋi mendeŋniga mohot mohot neŋön mi me mi nanŋök nanŋök buŋa qem anŋuba maljin.

8 Awanöm qahö aka malö maljei, engöra kewö jizal: Enjön ni ewö toroqeba awanöm qahöpmö, solanji malmei, mi mönö ölopñi akza.

9 Ölopñi akzapmö, awanöm akingö uruñini könöp jeiga malbepuköra mönö ölop awanöm aketka amqema. Mianğöra yeñon uruñini galöm kölbingö osize ewö, mönö ölop awanöm akñe.

10 *Awanöm maljei, engöra kewö jim kutuzal, nöñönök qahöpmö, Kembunöñ nanjak mönö keu ki jiza: Anömñan apñi kude mosötma.

11 Mewö jizapmö, töndup apñi mosötma ewö, mönö azi kun kude memba öne malma me apñambuk kunbuk eraum möta urumohot aka malmahot. Mewöyök apñan anömñi kude mosötma.

12 Mi Kembugö keuyapmö, awanöm tosatñi engö goronjini mi Kembunöñ qahö jizapmö, nanak mi kewö jizal: Urumelen azi kungö anömñan uruñi qahö melenđa töndup yambuk malmamgö mötzawi, yañon mönö anömñi mi kude mosötma.

13 Mewöñanök urumelen ambi kungö apñan uruñi qahö melenđa töndup yambuk malmamgö mötzawi, yañon mönö apñi mi kude mosötma.

14 Mianğö könañi kewö: Kungö apñan urumelenğö kopa azia aiga Anutunöñ i töndup urumelen anömñi qekötahözawañğöra aka tök kutum wañgiiga sarakñi akza. Mewöñanök kungö anömñan mötnaripñi qahöpmö, urumelen apñi qekötahözawañğöra aka Anutunöñ i tök kutum wañgiiga sarakñi akza. Kunöñ sarakñi qahö akawak ewö, nahönböratñiran mönö Anutugö sel

* 7:10: Mat 5.32; 19.9; Mak 10.11-12; Luk 16.18

yaigepņe malbeak. Mewö malbeakmö, Anutunöņ mohotņe tök kutum enġiyöhaņġöra mönö sarakņi akze.

¹⁵ Sarakņi akzemö, kunņan qahö möt nariba apņi me anömņi mosötmaņgö mötza ewö, mönö ölöp mosötma. Mewö asuhuiga nöņgö keunan urumelen alanini mi qahö jöhöma. Anutunöņ inġini luainöņ malmegöra enġoholök.

¹⁶ Ambi, gi apki uru kuņġum waņġinöņga uruņi melenma me qahöwi, mi mönö denöwö mötpanak? Me azi, gi anömgi uru kuņġum waņġinöņga uruņi melenma me qahöwi, mi mönö denöwö mötpanak? Mianġöra mönö luainöņ malme. Mewö.

Anutunöņ enġoholöhaņġö dop mönö toroqeba malme.

¹⁷ Kembunöņ mohot mohot enġö malmalņini areņ aliga awanöm me solanņi malgetka Anutunöņ enġoholöhi, mianġö dop mönö toroqeba mala malmalņinaņġö könanņi kude uteköme. Urumelen könagesöņi könagesöņi liliköba miri dop mewö jim kutum enġimakzal.

¹⁸ Anutugö aiwesökņi azi kungö silene yaņdiget maliga mewö oholök ewö, mi mönö kutumamġö kude kapan kölma. Anutugö aiwesökņi kungö silene qahö yaņdiget maliga mewö oholök ewö, mönö mi yandimeġö kude kapan kölma.

¹⁹ Anutugö aiwesökņi silenine yandiget ahöza me qahöwi, mianöņ Anutugö jeņe yuai omanņi akzapmö, jöjöpāņ keuņi tem köla wuatāņġöingā öljā akza.

20 Anutunöŋ engoholiga nalö mianğöreŋ awanöm me solanŋi malgeri, iŋini mohot mohot mönö mianğö dop toroqebe malme.

21 Kungö welenqege omani aknöŋga Anutunöŋ goholök ewö, mianğöra mönö waimanjat kude aka malman. Urugi melenđa ölop solanŋi aka nup kun miwikŋaibanak ewö, mi mönö ölop miwikŋaiman me urugi amqeiga ölop toroqebe welenqege omani malman.*

22 Mi kewögöra: Kunöŋ welenqege omani aiga Kembunöŋ mewö oholi uruŋi melenŋiga ŋiŋgisöndokŋaŋgö kösöŋi pösariga solanŋi aka malja. Mewöŋanök kunŋan solanŋi aiga Kembunöŋ mewö oholi uruŋi melenŋiga nanŋi imbi-imbi qahöpmö, Kraistkö jitŋi tem kölmapkö kösönöŋ kinda welenŋi qeba malja.

23 Kraistnöŋ bohonŋi ketanŋan söŋgöröŋini meiga maljeaŋgöra mönö gölme ambazip yeŋgö keu keŋgöt bapŋe anda welenqegeŋini omani aka malbepuk.

24 Mianğöra urumelenŋ alaurupni, Anutunöŋ engoholiga nalö mianğöreŋ solanŋi kösöŋini qahö me welenqege toŋinaŋgö kösö gwarönöŋ malgeri, iŋini mohot mohot mönö mianğö dop Anutugö jeŋe toroqebe malme. Mewö.

Gwabö seram aka malö yeŋgö goro keuŋini

25 Ambi seram jömukŋi† engö goroya mi Kembunöŋ qahö jim kutui mötzal. Mianğöra Kembunöŋ ak kömum niŋgiiga keuni laŋ qahöpmö,

* **7:21:** Keu mianğö könanŋi kun kewö: Urugi melenđa ölop solanŋi aka nup kun miwikŋaizan ewö, gi ölop toroqebe welenqege omani malman. † **7:25:** qesabulum qahö qeŋeŋi

möt nariget dop köljawanğö dop jimakzali, mönö mianğö dop kewöta nani mötmötnan kewö jimam:

²⁶ Kahasililin nalöni dopdowizawanğöra gwabö seram maljei, körek eñön mönö mianğö dop toro-qeba malgetka ölöwakza. Mewö mötmörizal.

²⁷ Ambi memba maljan ewö, anömgi mosötmangö kude akña. Anömgi qahö solanji maljan ewö, mönö ambigöra kude jaruman.

²⁸ Töndup ambi memani, mianjön mönö siñgisöndokni qahö akña. Mewöñanök ambi seramnöñ azi memawi, yañön siñgisöndok qahö akña. Siñgisöndok qahöpmö, mewö akñei, yeñön mönö silenjanan kahasililin gwötpuk miwikñaiba mötme. Eñön mi mötpepuköra mönö anğön köl engimamgö mötzal.

²⁹ Mewö möta goro engizalmö, urumelenj alaurupni, keu kun kewö jimam: Kembu kamawanğö nalöñan törizawanğöra aka ambi memba maljei, eñön mönö mewöyök nalö kianğoreñök könahiba anömñini qahö tandök ewö aka malme.

³⁰ Wösöbirik aka sahötzei, eñön mönö qahö sahötmeanğö tandök ewö aka malme. Uruñini ölöwahiga söñgaizei, eñön mönö qahö söñgaimeanğö tandök ewö aka malme. Yuai bohonñi mezei, eñön mönö mi qahö buña qem anğumeanğö tandök ewö aka malme.

³¹ Gölmönöñ nalö kewöñe arenj wuatanjömakzei, mianjön mönö ayapkömawanğö dop akza. Mianğöra gölmegö öröyuaiñi kölköl-örörö aka nupköra alakzei, eñön mönö mianjön uruñini jöhömakzawanğö tandök ewö kude aka malme.

³² Injini gölmegö lömbötköra waimanjat qahö malmegö sihimni mötzal. Awanöm qahö solanji

maljawaŋön mönö Kembugö öröyuaigöra waiman-jat mörakza. Mi möta “Denöwö akiga Kembugö uruŋan ölöwahi dop kölbawak,” nanŋaŋgöra mewö jimakza.

³³ Mewö jimakzapmö, ambi memba maljawaŋön mönö gölmegö öröyuaigöra waiman-jat mörakza. Mi möta “Denöwö akiga anömnaŋgö uruŋan ölöwahi dop kölbawak,” nanŋaŋgöra mewö jimakza.

³⁴ Kembunöŋ likep anömnaŋ likep mötmötŋi öröyohotka urudenŋen aka malja. Mewönaŋök ambi aŋŋi qahö aka ambi seram solanŋi mal-jahoraŋön mönö Kembugö öröyuaigöra waiman-jat mörakzahot. Mi möta “Denöwö akiga uŋani aka sileni sarakŋi aiga Kembugöra dop kölbawak,” nanŋiraŋgöra mewö jimakzahot. Mewö jimakza-hotmö, azi memba maljawaŋön mönö gölmegö öröyuaigöra waiman-jat mörakza. Mi möta “Denöwö akiga aŋnaŋgö uruŋan ölöwahi dop kölbawak,” nanŋaŋgöra mewö jimakza.

³⁵ Nanŋini bauköm enŋimangö möta goro mi enŋizal. Mi tosatŋi kösö ewö jöhöm enŋibi lömböt miwikŋaimegöra qahöpmö, könaŋi kewögöra mi enŋizal: Nöŋön iŋini ahakmeme diŋdiŋi wuatanaŋgöba urudenŋen qahöpmö, pöndaŋ Kembubuk qekötahöba kin köhöimegöra mötzal. Mianŋgöra goronŋi mi jizal. Mewö.

³⁶ Azi kunŋan ambi serambuk buŋa qeba malagun aŋgömosötpitkö mötmörizahori, yetkö goronŋiri kewö jimam: Azi mianŋön kewö mötmöriba jiza, “Ambi mi memba mewö törörök qahö ak waŋgibileŋak.” Mewö juiga ambi memawaŋgö sihimŋi möt köhöiiga ambigö yambuŋi azi

memegö dop akza ewö, yañön mönö ölop sihimñangö dop aiga ameyohotka dop kölma. Mewö mianñön singisöndokñiri qahö akña.

³⁷ Qahö akñapmö, azinöñ ambi mi qahö memapkö keuñi nanñi uruñan jöhöba möt köhöizawi, mianğöra kewö jimam: Kunñan azi mi kuñgui qahö qaközapmö, ölop nanñi sihimñangö dop wuatangöba keunöñ qahö jöhöi ahakza ewö, yañön mönö ölop sihimñangö dop aka ambi mi qahö mema.

³⁸ Mewö aiga ambi seram mezawañön mönö dopñe akzapmö, i qahö mezawañön mönö köna ölop sorokñi wuatangöba törörök akza. Mewö.‡ (v 37b) Qahö akñapmö, iwiñan bōratñi azi qahö wañgimapkö keuñi nanñi uruñan jöhöba möt köhöizawi, mianğöra kewö jimam: Kunñan iwi mi qahö kuñgui qaközapmö, ölop nanñi sihimñangö dop wuatangöba keunöñ qahö jöhöi ahakza ewö, yañön mönö ölop sihimñangö dop aka bōratñi añğön kölma. (v 38b) Mewö aiga bōrat seramñi azi wañgizawañön mönö dopñe akzapmö, i qahö wañgizawañön mönö köna ölop sorokñi wuatangöiga törörök akza. Mewö.

³⁹ Ambinöñ apñan jebuk malmawañgö dop amöamögö keuñan jöhöi maljapmö, apñan kömuma ewö, keu mianñön mewōñanök kömuiga ölop azi si-

‡ **7:38:** 36b Azi kunöñ bōratñi azi wañgimangö uruyahöt mötzawi, wañgö goronñi kewö jimam: Iwiñan kewö mötmōriba jiza, “Bōratni wañgiba mewö törörök qahö ak wañgibileñak.” Mewö jiiga bōratñangö yambunñi azi memegö dop aiga azi wañgimangö sihimñi möt köhöiza ewö, yañön mönö ölop sihimñangö dop aka mosōriga azi meiga dop kölma. Iwiñan mewö mianñön singisöndok qahö akña.

himnan jimawanğö dop mema. Urumelenğö kopa azia qahöpmö, azi Kembubuk qekötahözawi, miyök mema.

⁴⁰ Ölop azi memba sösöngai qorembeni miwikñaimapmö, toroqeba solanñi malma ewö, mönö urusösöngai ölni miwikñaiba söngaimakña. Nöñön keu mi kewöta mewö jizal. Anutugö Uñañan nöngö urune mewöyök maljawi, mianğöra mönö mewö mötmöriba jizal. Mewö.

8

Nene tandö lopionğö naluk alalñi mi nembin me qahö?

¹ İñini nene tandö lopionğö naluk alalñi mianğöra ohogetka goro kewö jimam: Urukalemnöñ mönö bauköm enğima. Goranora jigetka tosatñan kewö jimakze, “Körek neñön tandö lopionğö könañini möt yaköinga omani akza.” Keu mi ölbölña akza, mi mötzin. İñini mötmöt mewöñi jiba malgetka uruñinan wahöriga koñaen ewö tererenğöba aiwelikömakze. Mewö aka denđa siksauk malje. Köna bohonñi mi urukalem. Köna mewö mianñön mönö nanini urunini möhamğöba mem köhöim anğubin.

² Kunöñ “Keu kungö könañi möt yaközal,” mi jitnöñ jizawi, yanğö mötkutukutuñi ölnan mönö qahö asuhuiga toroqeba tönpin malja.

³ Mi keunöhök jizapmö, kunñan Anutu uruñan jöpakömakzawi, Anutunöñ mönö yanğöra möri ölni akza.

⁴ Nene tandö lopion yengöra naluk algeri, mi nembin me qahöpto? Keu kewö jimakze, “Tandö lopion mi bem ölni qahö maljeanğö kaisöpsöpñini

akze,” aka keu kun kewö, “Anutu mohotnöŋ malja. Alaŋi kun qahö.” Keu yahöt mi ölna akzahot, mi mötzin.

⁵ Keu mianğö könaŋi kewö, “Öme bemŋi bemŋi,” qetŋini mewö qerakzei, mi gwötpuk malje. Suepnöŋ me gölmenöŋ maljei, mi ölop qahö mötzin. Ölna ömewöröme, bem aka azi kembu mi gwötpuk malje.

⁶ Mi maljemö, mi töndup Anutu mohot yaŋönök nanini bemnini aka Iwinini akza. Yaŋön yuai pakpak miwikŋaii asuhuyök. Malmalnini yaŋgöra malbingöra aka al neŋgi maljin. Mewöyök Kembu mohot Jisös Kraist malja. Yaŋön Anutu bauköiga yuai pakpak miwikŋaiyohot. Nini mewöyök bauköm neŋgiiga mal köhöimakzin.

⁷ Mewö möt narizinmö, ambazip körekŋan mönö mötkutukutu mewöŋi mi qahö memba malje. Mi qahöpmö, tosatŋan mutuk tandö lopioŋ waikŋini memba möt köhöigeranğöra aka dölkewöŋe mewöyök toroqeba nene tandö lopioŋgö naluk alalŋi mi memba mewö mianğön amqeba bemurup mi mötmöriba malje. Uruŋinan lölöwöröŋi aiga uruyahöt aka negetka uruŋinan mianğöra tölöhomakza.

⁸ Tölöhomakzapmö, nenenöŋ neŋuangita Anutu kösutŋe qahö al neŋgimakza. Nene siŋgi malbini, mewö geŋmororoŋ qahö miwikŋaibin. Nene memba malbini, qetbuŋaninan mewö qahö qarima.

⁹ Mi töndup nene pakpak nemingö amqezei, eŋön mönö jaubatbat laŋ malbepüköra galöm mem anğuba malme. Mewö malgetka tosatŋan engeka uruŋinan lölöwörö aka bölii et enğubapuk.

¹⁰ Mianḡö könaḡi kewö: Göḡön mötkutukutu öḡi memba mala amqeba tandö lopionḡ jikenḡe anda tata nene nenönḡa alagi kunḡan gehi kewö lömbörima: Uruḡan lölöwöröḡi aiga uruyahöt akzawi, yaḡön mewö geke uruḡan wahöri amqeba nene tandö lopionḡö naluk alalḡi mi nempa et qebawak.

¹¹ Göhö mötkutukutugi öḡi mianḡön mönö nangi urumelenḡ alagi kunḡuiga uruyahöt qakḡe lölöwöröḡi akzawangöra mönö amqeba nempa et qebawak. Kraistnönḡ yaḡöra aka kömuyökmö, nene mi nempa mewö et qeba ayuhuiga qahö dop köḡma.

¹² Ayuhumapmö, urumelenḡ alaurupḡini mewö mem bölim enḡiba uruḡini lölöwöröḡi mi qeba köndenḡa sinḡisöndok ahakzei, mewö mianḡön mönö Kraist nanḡi qetala sinḡisöndok ahakze.

¹³ Mianḡöra nöḡön nene kun nembiga mianḡön urumelenḡ alani köḡgorom wanḡiiga et qeba sinḡisöndok akza ewö, nöḡön mönö nalö kunönḡ nene mi qahö toroqeba nemam. Nöḡön alani jölönḡöba köḡgorom wanḡibilenḡbuköra kapanḡ köla kinjal. Mewö.

9

Aposol denöwö akiga dop köḡbawak?

¹ Wani kösönḡ jöhöm niḡiiga solanḡi qahö ak-ilenḡak? Enḡön kewöt niḡigetka aposol akzal me qahö? Kembunini Jisösnönḡ asuhum niḡiiga ehal me qahö? Nöḡön Kembugöreḡ nanḡöba nup membiga inḡini nup mianḡö öḡi akze.

² Kembunönḡ nanḡak aposol nup niḡii yambuk kinda membiga inḡini uruḡini melenḡa nöḡö

mungem supapni akze. Mianğöra tosatñan kewöt niñgigetka aposol qahö akilenjak ewö, eñön mönö könañamni mewö möt yaköze. Mi mönö amqeba nangöba jigetka dop kölma.

³ Ambazip tosatñan nongöra “Aposola qahö akza,” jiba tokoba andönöñ qeçe ak niñgimakzemö, nöñön mönö engöreñ kösohot jiba mianjön nani könañamni nangöba jimakzal.

⁴ Mianğöra könöp numbu nene nengigetka neñakurupni yembuk memba memba malbinak, mianjön mönö dopñe akawak.

⁵ Pitö, aposol tosatñi aka Kembu Jisösgö munurupñi yeñön anömurupñini mötnaripñinambuha enğuanğita mohotñe anda kamakze. Nöñön mewöyök mianğö dop akilenjak ewö, silik mianjön mönö köna walöñda qötöñgatpilenjak me qahö? Mi qahöpmahöp.

⁶ Silegö malmalñe inini ambazip ipñi nangöm engimakzemö, ni aka Barnabas qahö. Niri töwa qahö netkigetka öne malakzit. Mi mötketka dop kölja me qahö? Tosatñan urugö nup megetka töwa engigetka silenjanğö nup qahö memakzemö, netköröhök mönö nangönanğöniri nanirak miwikñaibitkö dop jize me?

⁷ Gawmangö yarö nup memakzei, yeñgöreñök kunñan nanñi malmalñi nangöm anğuba memakza me qahö? Wain nup kömörakzei, yeñön körek mianğö ölni memba nemakze me qahö? Mewöñanök bulmakau galöm kölakzei, yeñön körek mianğö juzu oñi nemakze me qahö?

⁸ Keu mi gölme ambazip nanine mötmötnöhök mötöteiba qahö jizal. Anutunöñ mewöyök mönö

keu miyök Mosesgö Köna keunöŋ jiza.

⁹* Mosesgö Köna keunöŋ Juda yeŋgö nup meme silikŋini mi jim asariba kewö ohoget ahöza, “Wit padigö kötŋi aka kamböŋi kewötpingöra bulmakau aziŋi waŋgitketka padi kambu qakŋe tiba tözö zamgö makzawi, yaŋgö numbuŋi mönö kude mözöpköme. Mewö gumohom waŋgigetka ölöp nene kitipŋi neiga dop kölma.” Miaŋgö dop kiamnöŋ böröjaŋ memba sömbup meköi qeba nene kitipŋi waŋgiget neiga dop kölma. Anutunöŋ kiam bulmakau mienögöra waimanjat qahö möta mewö jiza. Mi qahö.

¹⁰Sömbupköra qahöpmö, keu mi mönö neŋgöra jii ahöza. Keu mi neŋön kewö akingöra aka ohoget ahöza: Kinöŋnöŋ nup barözawaŋön mönö öŋi asuhumapkö jörömqöröm qakŋe nupŋi memakŋa. Mewöyök padi dudutnöŋ qeba öŋi aka kamböŋi kewötzawaŋön mönö bahöŋi memba nemapkö al mamböta nupŋi memakŋa.

¹¹* Neŋön urugö keu kötŋi sutŋine qesiŋ gila malinga eŋön malmalgö naŋgönaŋgö yuai qahö neŋgigetka gamuŋambuk akza. Nöŋön mem ölöwak eŋgibiga eŋön miaŋgö likepŋi melenđa niŋgigetka dopŋe akŋa.

¹²Tosatŋan sutŋine urugö nup megetka naŋgöm eŋgigetka dopŋe akza ewö, ni mönö dop mi oŋgita naŋgöm niŋgigetka dop kölma. Likepŋi eŋgiinga miaŋgö likepŋi neŋgigetka dop kölbowakmö, nöŋön miaŋgö dop akŋegöra qahö qesim eŋgial. Kraistkö Ölöwak Buŋa keu sehimapkö könaŋi jöhöbinbuköra mönö yuai neŋgimegöra qahö qesim eŋgiin.

* **9:9:** Dut 25.4; 1 Tim 5.18 * **9:11:** Rom 15.27

Qahöpmö, naninahök mönö kapan köla köhöiba lömböt pakpak bisiba malin.

13 *Keu ki mönö mötmörime: Jöwöwöl jikenöñ nup memakzei, yeñön mönö jike miangöreñök numbu neneñini memba nemakze. Jöwöwöl ohoba altagö könöpñi galöm kölmegöra kungum engigetka kinjei, yeñön ambazip nene nalukñini altagöreñ algetka nene miangö kitipñi tosatñi mi miangöreñök buña qem anğumakze.

14 *Keu miangö dop Kembunöñ mewöyök jim kutuba keu kewö jiyök, “Ölöwak Buña jim sehigetka ambazipnöñ mötmei, yeñön mönö Ölöwak Buñagö likepñi kötön naluk algetka malmalñinanğö nañgönañgöñini miwikñaiba malme.”

15 Nöñön ölop keu miangö dop mötmöriba urugö nup memba töwa niñgimegöra qesim engibileñakmö, kötön naluk almeangö keu pakpak mi mönö mosöral. Moneñ almeangö keu ohozali, mi eñön mewö ak niñgimegöra aka qahö ohozal. Töwa memangö mötmöribi lömböriiga kömükömugö mötpiga anqeza. Nanañgöra mi keu omani qahöpmö, töwa qahö niñgimegö keuñi mi mönö sileni möpöseiba jizal. Nöñgöreñ keu mi kunöñ kun qeapkömamgö osiiga malmam.

16 Ölöwak Buña jim sehimakzali, miangöra sileni möpöseimangö dop qahö akzal. Nöñön Anutugö jimkutukutu bapñe mala mi jim sehimangö dop akzal. Nup mi mönö mosötmangö osizal. Ölöwak Buña qahö jim sehibileñak ewö, miangöra

* 9:13: Dut 18.1 * 9:14: Mat 10.10; Luk 10.7

lömbötnöŋ qakne öŋgöiga neka pölzik jimeanğö dop akileŋak.

17 Nani sihimnanğö dop nup mi möwölöhöba membilenjak ewö, mönö ölop töwa niŋgimegöra mambötpilenjak. Mimö, Anutunöŋ kuŋgum niŋgiiga nani sihimni qahö mötöteiba Buŋaŋi galöm kölakzal ewö, mi mönö Anutunöŋ möt narim niŋgiba nupŋi niŋgii maljalanğö dop memakzal.

18 Mewö aiga wanatnöŋ mönö töwa ak niŋgimakza? Ölöwak Buŋa jim sehiba mi söŋgöröŋi qahö ahakzali, mianğön mönö töwa ak niŋgimakza. Anutunöŋ nupŋanğö likepŋi niŋgimegöra jim kutui Buŋa Kimbinöŋ ahözawi, keu mianğö dop töwagöra qahö kapan kölakzal.

19 Ambazip kuŋŋan kun qahö jöhöm niŋgiiga ölop nani imbi-imbi malbilenjakmö, mi töndup mönö nani memba et al anğuba maljal. Ambazip körekŋan uruŋini melenmegöra kapan kölakzal. Mewö akŋegöra ambazip körek welenŋini qeba maljalmö, sehisehiŋi yeŋön töndup Kraistkö buŋaya qahö akŋeanğö dop akze.

20 Juda yeŋön uruŋini melenmegö bauköm eŋgiba sutŋine Juda tandök aka malal. Mosesgö Köna keu bapŋe maljeanğön uruŋini melenmegö bauköm eŋgiba nanak Köna keu mianğö bapŋe qahö mala töndup keu mianğö gwaröŋe maljal tandök aka sutŋine malal.

21 Mosesgö Köna keu qahö möta maljeanğön uruŋini melenmegöra bauköm eŋgiba sutŋine Köna keu qahö möta maljalanğö tandök aka malal. Nanak Anutugö Köna keugöra tönpin qahö maljalmö, Kraistkö Köna keu bapŋe anda mi tem

kölakzal. Mi töndup yeŋgö sutŋine Anutugö Köna keu qahö mötmöt tandök aka malal. Ambazip sehisehiŋan uruŋini meleŋmegöra mewö aka malal.

²² Mötnariŋnöh lölöwöröhü maljeaŋön uruŋini meleŋda köhöimegö bauköm eŋgiba sutŋine lölöwöröhü tandök aka malal. Ambazip tosatŋi wani awamŋan köna inöh me wainöh uruŋini meleŋmegö meköm eŋgiba ambazip könaŋi könaŋi yeŋgö sutŋine tandök könaŋi könaŋi aka malal.

²³ Tandök pakpak mi Ölöwak Buŋanöh sehimapköra aka ahakzal. Sehiiga kötümötuetŋan nani qakne öŋgöi nanak mewöyök oyaeŋkoyaen akŋamgöra aka mewö ahakzal.

²⁴ Keu ki mönö mötmörime: Ösumtiti nalöŋe körek yeŋön luhut almegöra ösumŋini qezaköba anakzemö, mohot kunŋan mönö luhut ala töwa mema. Inŋini mönö mohot miangö dop ösumŋinan anda töwa membingöra kapaŋ köla malme. Mönö miangö dop mötnariŋ köl guliba malme.

²⁵ Ambazip mönahotnöh luhut albingö anakzei, yeŋön mönö körekŋan nanŋini törörök galöm köl aŋgubingö köl gulimakze. Yeŋön kösatorom julkula gororongömawi, miyök membingö kapaŋ kölakzemö, neŋön ila jalö qahö ayapkömawi, mönö töwa mi membingö kapaŋ kölakzin.

²⁶ Miangöra nöŋön ösumnan laŋlaŋ an köl kam köl qahö anakzal. Böröni misiba bim laŋlaŋ qahö qemakzalmö, aŋgit alaurupni luhut al eŋgimangöra mönö diŋdiŋanök törörök qemakzal.

²⁷ Nöhön ambazip tosatŋi Buŋa keunöh uruŋini kuŋguba malbi teköiga Anutunöh mönö andö nungui nanak ila jalöhü qahö membilenbuk.

Miaŋgöra mönö nani sileni mindiŋgöba törörök köl guliba galöm kölakzal. Mewö.

10

Israel mutuk malgeri, yeŋgöreŋ galöm meme keu

¹ *O urumelen alaurupni, Israel neŋgö ambösakoninan Mosesgö andöŋe kaba wuatangögetka yuai asuhuyöhi, miaŋgöra mönö gukmaulem malbepuk. Miaŋgöra Israel neŋgö könanini kewö suariba ohozal: Yeŋön mönö körek kousu bapŋe kaba mala Köwet Pisikŋi kutugetka yeŋgöreŋök kunŋan kun qahö ayuhuyök.

² Anutunöŋ o melunŋi kousunöŋ aka köwetnöŋ aliga mi kutuba kaba körekŋan uruŋini melenŋa Mosesgö könagesöŋi aket.

³ *Mewö aka körek yeŋön urugö nene miyöhök miwikŋaiba nemba malget.

⁴ *Mewöyök körek yeŋön urugö oŋi miyöhök miwikŋaiba nemba malget. Urugö oŋi mi köt ketanŋi kunöŋ enŋuatangöba könanŋine kayöhi, mönö miaŋgöreŋök miwikŋaiget. Köt ketanŋi mi Kraistkö söpsöpŋi.

⁵ *Mewö malgetmö, mi töndup Anutunöŋ könagesö ölni miŋgöra urusösöŋgai qahö möta maliga gölme qararanŋkölkölŋe ayuhugetka qamötŋinan qeqelanŋan ahöba gisahöget.

⁶ *Mewö asuhuyöhi, mi nanini kezapqetoknina akza. Anutunöŋ mönö söpsöp mi neŋgöra aka aliga galöm meme keunina kewö akza: Yeŋön uruŋini

* **10:1:** Eks 13.21-22; 14.22-29 * **10:3:** Eks 16.35 * **10:4:** Eks 17.6; Jan 20.11 * **10:5:** Jan 14.29-30 * **10:6:** Jan 11.4

qahö galöm köla bölöñangöra köpösöñgögeri, neñön mönö mianjö dop aka ayuhubinbuk.

7 *Mewöyök Israel yengöreñök tosatñan tandö lopion waikñini memba möpöseiba malgeri, eñön mönö mianjö dop aka malbepuk. Yengöra Buña Kimbinöñ keu kewö ohoget ahöza, “Könagesö yeñön nem sösöñgai ala tokoba tatketka uruñinan wahöriga mianjön melenđa kezapjupjup kewö ahök: Yeñön liñet gwawet unduba o köhöikñi nempa serowilin lañ aket.” Keu mewö ahöza.

8 *Yengöreñök tosatñan serowilin aketka Anutugö irimsesewölñangöra aka ambazip 23.000 mianjö dop silim mohotkö uruñe kömumba etket. Neñön mönö tosatñi miengö dop serowilin akinbuk.

9 *Mewöyök Israel yengöreñök tosatñan Kembu esapköm wañgigetka mokoleññöñ engöhögetka kömuget. Neñön mönö tosatñi miengö dop Kembu esapköm wañgibinbuk.

10 *Yengöreñök tosatñan galömurupñini irikuruk jimongot aka andö enguba malgetka mem ayuayuhu garatanöñ mönö engui kömuget. Neñön mönö tosatñi miengö dop irikuruk jimongot lañ aka malbinbuk.

11 Mewö asuhum engiyöhi, söpsöp keu mi mönö nanini kezapqetoknina akza. Gölmenöñ malmalgö nalö teteköñan kam kuñgum neñgii maljini, kösohot mi mönö neñgöra aka ohogetka galöm meme keunina akza.

12 Mianjöra kin köhöimangö jizani, mönö et guhubapuköra galöm mem añguba malman.

* 10:7: Eks 32.6 * 10:8: Jan 25.1-18 * 10:9: Jan 21.5-6

* 10:10: Jan 16.41-49

13 Esapesap qakɲine öngömakzei, mi gölme ambazip körek neŋgö qakɲine öngömakze. Esapesap qainɲi kun miwikɲaibeak, miangöreɲ ösumɲinan qahö dop köljawanğöra etpeakmö, Anutunöɲ keuɲi jöhöyöhanğö dop mi pöndaɲ wuatangöba ahakza. Yanön esapesap Tonɲi anğön köliga esapesap ösumɲini qahö dop kölmawanğö dop mi al enğimangö osimakza. Mewögöra esapesap mötketka Anutunöɲ ösumɲi enğiba mewö mianğön ölöɲ kölbिंगö köna mewöyök mesat enğii asuhumakza. Mianğöra enğön gölmegö esapesapɲi mi ölop kin köhöiba luhut almeanğö dop akze. Mewö.

Tandö lopionğö lömbuan aka Kembugö semön kömbukɲi

14 Mianğöra wölböt alaurupni, tosatɲan tandö lopionɲ waikɲini memba möpöseim enğimakzemö, enğön mi kök ala mosötme.

15 Nöɲön mötmöt ambazip aködamunɲinambuk akzeanğö dopkeu jimami, mi mönö nanɲinak kewöta mianğö ölnɲi miwikɲaime.

16 **“Kembugö semön nene nembin,”* jiba kötümötuetkö qambigöra Anutu saiwap jiba köuluköba qambi mianğöreɲök nemakzinanğöreɲ mönö Kraistköreɲ toroqeba sepɲi nemakzin. Beret mindipköba mianğöreɲök nemakzinanğöreɲ mönö Kraistköreɲ toroqeba busuɲi nemakzin. Mianğöra ölüm enğubapuk.

17 Körek neɲön beret mohot mianğöreɲök nemakzin. Beret mi mohot akzawanğöra aka gwötpuk neɲön mönö Kraistkö ölnɲi mohot akzin.

* **10:16:** Mat 26.26-28; Mak 14.22-24; Luk 22.19-20

18 *Injini mönö Israel könagesögö malmalñi mötmörime. Ambazip jöwöwöl ohomegöra nene algetka tosatñan mianğö kitipñi nemakzei, yeñön mönö altagöreñ toroqeba nupñi Anutugöra memakze.

19 Keu mianğö könañi ölni mi mönö denöwö jibilenjak? Tandö lopionğ engöra bau qegetka sepñi eri jöwöwöl ohomakzei, mianğön ölnambuk akzawağgöra jiza me qahö? Tandö lopionğ mi ölni akzeanğgöra jiza me qahö? Keu mianğö könañi denöwö?

20 *Tandö lopionğ mi ölni qahöpmö, urumelenğö kopa yeñön töndup jöwöwölñini ömewöröme yeğgöra ala ohomakze. Mi Anutugöra qahö. Nöñön injini ömewöröme yembuk toroqeba malbepuköra waimanjat mötzal.

21 Injini Kembugö qambinöhök aka ömewöröme yeğgö qambinöhök öröröñ nemingö osime. Mewöyök Kembugö nene dum aka ömewöröme yeğgöreñ nene dum mi öröröñ toroqebingö osime.

22 *Ahakmeme mewöñan mönö Kembugö uruñi qei bölüiga irimñi seholimapköra mötzin me? Kukösumninan mönö Kembu oñgita öngöba maljin me?

Nanine imbi-imbi mosöta Kembu möpöseibin.

23 *Tosatñan kewö jimakze, “Nini ölop nanine imbi-imbi yuai pakpak ahakzin.” Keu mi ölnapmö, ahakmeme pakpak mianğön mönö qahö bauköm

* **10:18:** Lew 7.6 * **10:20:** Dut 32.17 * **10:22:** Dut 32.21

* **10:23:** 1 Kor 6.12

nengimakza. “Nini ölöp nanine imbi-imbi yuai pak-pak ahakzin,” mewö jimakzemö, ahakmeme pak-paknöŋ mönö urunini qahö nanğöba mem köhöim nengimakza.

24 Kunŋan kun nanŋanğörök mötmöriba ölöwakŋamğöra kapan kölbaşukmö, alaurupŋan ölöwakŋegöra kapan köli dop kölma.

25 Sömbup i me wai maketnöŋ aka qeköm nene mire bohonŋi memegöra alakzei, mi mönö uruyahöt mosöta nemakŋe. Sömbupköra uruŋinan tölöhobapukö qesiqesinŋi kun mönö kude akŋe. Qahö!

26 *Keu miangö könaŋi mi Buŋa Kimbinöŋ kewö ohoget ahöza, “Gölme aka yuai pakpak miangörenŋ ahözawi, mi Kembugö buŋaya akza.”

27 Kun Kraist qahö möt narizawaŋön enğoholiga yaŋğorenŋ anbingö möta anda tatketka nene i me wai jeŋine al enğime, mi mönö uruyahöt mosöta neme. Nenegöra uruŋinan tölöhobapukö qesiqesinŋi mi mönö kude akŋe. Qahö!

28 Nanŋinaŋğöra qahöpmö, “Nene ki mönö tandö lopionŋ yeŋğö naluk alalŋi akza,” kunöŋ mewö jii mötme ewö, mi jiyöhi, yaŋğöra aka uruŋan bölibapuköra mönö galöm mem aŋguba kude neme.

29 Nangi urugan tölöhobapuköra qahö jizalmö, alagahö uruŋan bölibapuköra mi jizal. Nöŋön nani imbi-imbi yuai akiga alanangö uruŋan bölüiga kewöt niŋgiba Anutunöŋ keuni jim teköba likepŋi meleş niŋgibapuk. Öne mewö mendenŋ aŋguinga jabö ahuiga qahö dop kölja.

* 10:26: Sum 24.1

³⁰ Nöñön ambazip yembuk toroqeba tata neneninañgöra “Anutu pipsaiwap!” jiba sömbup nemami, tosatñan mewö neka miangöra andö nunjugetka qahö dop kölma. Sömbupköra Anutu möpöseizali, miangöra mönö keu töhöreñ jim niñgigetka qahö dop kölja.

³¹ Miangöra o me nene nemei aka i me wai akñei, mi pakpak mönö Anutugö qetbuñan sehimapköra aka ahakñe.

³² Yuai kun kude aketka kungö uruñan miangöra böliiga mötnariñan söörauba etpapuk. Juda me kantri tosatñangö ambazip me Anutugö könagesö miengö sutñine kungö uruñan mönö engöra aka bölibapuk.

³³ Nöñön mewöyök yuai pakpak ahakzali, miangöreñ mönö ambazip körek pakpak uruñinan ölöwakñapköra kapan kölma maljal. Nanök ölöwakñangöra qahö kinjalmö, ambazip sehisehiñan ölöwakñegöra jaram tibiga kunbuk letota Suepkö buñaya akñegöra kapan kölakzal. Mewö.

11

¹ *Nöñön Kraistkö silik ewö ahakzali, miangö dop eñön mönö nöngö silikni wuatangöba malme. Mewö.

Ambi eñön mönö nöroñjini eshuba Kembu möpöseime.

² Nöñön yuai pakpak ahakzali, iñini miangöreñ mötmörim niñgimakzeangöra saiwap jim engizal. Iñini kusum engialangö dopkeuni tem kölma wuatangömakzei, miangöra mönö möpöseim engizal.

* **11:1:** 1 Kor 4.16; Fil 3.17

³ Nöñön inini keu ki möt kutumegöra mötzal: Kraistnöñ azi körek neñgö bohonini akza. Azinöñ ambigö bohonji akza aiga Anutunöñ Kraistkö bohonji akza.

⁴ Miañgöra azi inini mönö duhuñini qeköba köuluköba Anutugö keu jigetka dop kölja. Azi körekñan nöropñini turuba köuluközei me Anutugö kezapqetok keu jim asarizei, Anutunöñ mönö yeñgö mötmötninañgöra möri gamuñambuk aiga nanñini memba et al añgumakze.

⁵ Mewömö, ambi kunñan nöropñi qahö esuhuba qenjarök totokonöñ köuluközawi me Anutugö kezapqetok keu jim asarizawi, yañön mönö apñi nöropñi akzawi, mi gamu qeba nanñi memba et alja. Mewö aka nörop jupñi körek mitigetka aukñe öne maljawañgö dop akza.

⁶ Ambinöñ nöropñi qahö esuhuza ewö, yañön mönö nörop jupñi mewöyök jiiga mitigetka dop kölja. Mi dop köljapmö, ambinöñ nörop jupñi jiiga mitigetka gamuñambuk akapuk. Miañgöra mönö nöropñi esuhuba mali dop kölja.

⁷ *Ambinöñ apñañgö aködamunñi akzapmö, azinöñ Anutugö imutñi aka aködamunñi akza. Miañgöra azinöñ mönö nöropñi kude esuhui dop kölma.

⁸ *Mi kewögöra: Mutuhök azinöñ ambinöhök qahö asuhuyökmö, ambinöñ azigöreñök asuhuyök.

⁹ Anutunöñ azi mi ambigöra qahöpmö, ambi mi azigöra miwikñaiiga malje.

¹⁰ Könañi miañgöra aka ambinöñ mönö kukösum bapñe malmalgö aiwesökñi mi nöropñi esuhuba

* **11:7:** Jen 1.26-27 * **11:8:** Jen 2.18-23

maliga dop kölja. Mewö aiga Suep garata yeñön gödaqeqegö silik ölopñi ehakze.

11 Mewö dop köljapmö, Kembubuk qekötahöba malinga ambinöñ mönö azigö keuñi qahö oñgita nanñi imbi-imbi lañ kude malma. Azinöñ mewöyök ambigö keuñi qahö oñgita nanñi imbi-imbi lañ kude malma.

12 Ambinöñ azigö sihitñeyök asuhuiga miangö dop azinöñ mewöyök ambigö körö uruñeyök asuhiba maljinmö, öröyuai pakpakö könanñi mi Anutu.

13 Miangöra ambinöñ nöröpñi qahö esuhiba Anutu köuluköiga dop kölja me qahö? Keu mi mönö nanñinak kewöta jöhöme.

14 Anutunöñ ambazip miwikñaim neñgiba gölmenöñ mohotñe malmal areñgöyöhi, areñ mi eka kewöta silik kewöñi mönö möt asarizin me qahö? Azinöñ nöröp jupñi qahö mitiiga köriza ewö, miangön mönö gamu qem wañgiza.

15 Anutunöñ ambigö nöröp jupñi köröpñi mi esuñi akñapköra wañgii malja. Miangöra ambinöñ nöröp jupñi qahö mitiiga köriza ewö, miangön mönö aködamunñi ak wañgiza.

16 Kunöñ keu miangöra goranora akñamgö mötza ewö, nöñön miangöra keu mohok-kun kewö jimam: Anutugö könagesöñi könagesöñi Anutu möpöseibingö tokomakzei, yeñön mönö nembuk urumohot aka silik miyöhök wuatangöba silik tosatñi tökömakze. Mewö.

*Kembugö semön töröñi nemegö silikñi
Mat 26.26-29; Mak 14.22-25; Luk 22.14-20*

17 Inini urumelen totokononj tokoba miangorenj qahö ölöwahakzemö, mönö toroqeba böliqölimakze. Miangöra qahö möpöseim engizalmö, arenj ala jim kutum engizal.

18 Keu mutuknji kun kezapne gei kewö möral, “Inini urumelen könagesögö totokononj tokomakzei, miangorenj mönö sutnjine anjururuk ahakze.” Keu mi jiget möta bahöñanök ölnj akzawi, mewö möt narizal.

19 Sutnjine denja kambu morömorö aketka Anu-tunonj engehiga denike enön mötnaripkö esape-sapnönj kin köhöize aka denike enön qahö dop köljei, keu mianön mönö aukne asuhumakza. Miangöra uruyahöt qahö mötzal.

20 Urumelen totokononj tokomakzei, miangorenj mönö Kembugö semön törönj nemingö siliknji qahö wuatangömakze.

21 Mi kewögöra jizal: Semön törönj nemakzei, miangorenj örörönj qahöpmö, nanjök nanjök nenenjini memba könahiba lanj neget teköiga tosatñan toroqeba wösönjini aliga tosatñan o köhöiknji gwötpuk memba enjololonj akze.

22 Ahöahö mirinini ahöm engiza me qahö? Miangorenj ölop nene aka o neme. Anutugö urumelen könagesö jijiwilit ak engibingö mötze me ambazip wanapñi nenenjini qahö mi memba et al engibingö mötze me? Miangöra nöñon injini möpöseim engimangöra mötze me? Mewö qahöpmahöpmö, denöwö jim engibileñak?

23 Kembunonj keu ningiyöhi, nöñon mönö enön mewöyök mi mötmegöra kewö jimam: Kembu Jisös mamalolo mem wanjigetka sunjem miangorenj beret meyök.

24 Mi memba kötuetköba saiwap jiba mindipköba kewö jiyök, “Ki nani busuna. Mi enğöra aka tököm enğizal. Mi namba mönö ni mötmörim niñgiba malme.”

25 *Mewö jiiga neget teköiga mewöñanök qambi memba kewö jiyök, “Qambi ki mönö jöhöjöhö dölökñi akza. Nöngö sepni kianön mönö Anutugö jöhöjöhöñi mem köhöii ahöma. Mi nemakñeangö dop mönö ni mötmörim niñgiba malme.”

26 Beret aka qambi mianğöreñök nemakñei, mianğöreñ mönö nalö dop Kembunöñ kömuyöhi, mianğö buñani mem asariba mal öngögetka liliñgöba kaiga teköma.

27 Mianğöra kunñan beret me Kembangö qambi mianğöreñök iwilele qakñe nezawi, yañön mönö Kembangö busuñi aka sepñi memba et ala siñgisöndokñambuk akza.

28 Mianğöra ambazip neñön nanini uruninañgö könañi kewötagun mönö beret aka qambi mianğöreñök neinga dop kölma.

29 Kunñan Kembangö busuñi aka sepñi qahö göda qeba nene töhön ewö lañ nezawi, Kembunöñ mönö yañgö keuñi jim teköiga lömböt qakñe öngöma.

30 Lañ namba malgerañgöra aka ambazip sehisehiñan mönö sutñine löwöriba kawöl miwikñagetka gwötpukñan lök nöñ qeba kömuget.

31 Kömugetmö, nanini urunini kewötpinak ewö, Anutunöñ mönö keunini kewöta jim teköiga lömböt qahö miwikñabin.

* 11:25: Eks 24.6-8; Jer 31.31-34

³² Mi qahö miwikñaibinmö, Kembunöŋ keunini kewöta jim teköba mewö mönö nalö kewöŋe mindiŋgöm neŋgimakza. Könaŋgep jim teköm neŋgiiga ambazip uruŋini qahö melenŋeri, yembuk öröröŋ könöp sianöŋ gebinbuköra mönö mindiŋgöm neŋgimakza.

³³ Miangöra urumelenŋ alaurupni, nene nemegöra tokomakŋei, miangörenŋ mönö nanŋinanŋöra mamböt anŋuba öröröŋ nemakŋe.

³⁴ Kunöŋ wösöŋi alja ewö, yaŋön mönö nanŋe mire neneŋi nema. Tokoba laŋ negetka Anutunöŋ enŋeka keuŋini jim teköi lömböt miwikñaibepuköra mi jizal. Keu tosatŋi enŋörenŋ kamami, nalö miangörenŋ jim kutum enŋimam. Mewö.

12

Nup memegö mötmöt kalem miengö könaŋini

¹ O urumelenŋ alaurupni, nöŋön Uŋa Töröŋaŋgö mötmöt kalemŋi kalemŋi miangö keugöra gukmaulem malbepuköra mötzal.

² Urumelenŋgö kopa malgeri, nalö miangörenŋ inöŋ me wainöŋ enŋuaŋgiriga tandö lopionŋ omanŋi waikŋini memba möpöseiba malget. Mewö me mewö janjuŋ anda laŋ malgeri, mi ölöp mötze.

³ Miangöra inŋini keu ki mötmegöra jizal: Anutugö Uŋaŋan kun sölölohöiga “Jisös qesuahözal,” keu mi qahö jiza. Mewöyök Uŋa Töröŋan azi me ambi kun qahö sölölohöm waŋgiza ewö, yaŋön mönö “Jisösnöŋ Kembu ak niŋgiza,” keu mi jimangö o-iza.

4 *Nup memegö mötmöt kalemñi mi kõnañi kõnañi akzemö, Uña Töröñan mönö mohot akza.

5 Urumelen kõnagesö welen qem engibingöra nup kõnañi kõnañi memakzinmö, Kembunöñ mönö mohot akza.

6 Welen qem engibingöra Anutunöñ kukösumñi körek nenğöra menden nenğiiga amqeba köhöiba nup meinga ölni kõnañi kõnañi asuhumakza. Ölni pakpak mi Anutugöreñök kamakzapmö, Anutunöñ mönö mohot akza.

7 Uña Töröñan kõnagesö urunini nanğöi köhöibingöra möta nup memegö mötmöt kalemñi indeliga ölnan mönö mohot mohot nenğöreñ kewö me kewö asuhumakza:

8 Uña Töröñan kungö uruñe geba Anutu nam köliga mötkutukutu keu jijigö kalemñi wañgiza. Uña mohot mianönök mönö kun sölölohöiga mötmöt qainñi kun möt yaközawañgö kalemñi buña qem añguza.

9 Kunöñ Uña mohot mi qekötahöba mötnaripkö kalemñi buña qem añguza. Toroqeba kunöñ Uña Töröñi miyöhök qekötahöba mem ölö-ölöwakö kalemñi kalemñi buña qem añguza.

10 Kungöra añğöletot memegö ösumñi wañgiza. Kungöra Anutugö kezapqetok keu jijigö kalemñi wañgiza. Kungöra uña aka öme mendenbingö kalemñi wañgiiga uña ölöpñan me ömewöröme kunöñ sölölohöiga maljawı, mi ölöp kewörakza. Kungöra keuñi keuñi qainñi kun jijigö kalemñi wañgiza. Toroqeba kunöñ keu qainñi kun jiiga kungöra mi melenmapkö kalemñi wañgiza.

* 12:4: Rom 12.6-8

¹¹ Nup memegö mötmöt kalem pakpak mi Uña Töröñi mohot mianjönök mönö sölölöhöba möri dop köljawangö dop mendeniga körek neñon nanjök nanjök buña qem anguba maljin. Mewö.

Kraistkö ölñi mohotmö, kitipurupñi gwötpuk.

¹² *Silenini mohot akzapmö, töndup mianjö uruñe silegö kitipurupñi mi gwötpuk akze. Kitipñi pakpak mi gwötpuk akzemö, töndup mi mindiriba sile mohot akze. Kraistkö ölñan mewöyök mönö mianjö dop akza.

¹³ Mianjö könani kewö: Uña mohotnöñ mönö körek nini sölölöhöba melun mem neñgiiga Kraistkö ölñi mohot akzin. Nini Juda me kantri tosatñangö toñi maljini, nanini nupnini memakzini me tonini öne welen qem engimakzini, mi töndup körek nini mönö Uña miyök buña qem anguinga urunine geiga möt wangizin.

¹⁴ Sileninan mönö sile kitipñi mohotkö dop qahö akzapmö, mianjö uruñe kitipurupñi mi gwötpuk akze.

¹⁵ Könaninan kewö jibawak, “Ni böröya qahö. Mianjöra sile qahö toroqeba maljal.” Mewö jibawak ewö, mianjöra mönö töndup sile mosöta nanjök qahö malbawak.

¹⁶ Kezapninan kewö jibawak, “Ni jeya qahö. Mianjöra sile qahö toroqeba maljal.” Mewö jibawak ewö, mianjöra mönö töndup sile mosöta nanjök qahö malbawak.

¹⁷ Sileninan jömuk je akawak ewö, keu mötmötkö kezapninan mönö denike tatpawak? Mewöyök jömukñanök kezap akawak, mewö

* **12:12:** Rom 12.4-5

wörön mötmötkö söngörönninan mönö denike tatpawak?

¹⁸ Nanjök nanjök qahöpmö, Anutunöŋ sile kitip mohot mohot mi arengöba möri dop köljawanğö dop mindirim enjiiga sile mohot akze.

¹⁹ Sile kitip pakpak mi kitip mohot akeak ewö, mönö denöwö sile mohot akawak?

²⁰ Mewö qahöpmö, sile kitipnini mi gwötpukmö, silenöŋ mönö mohok akza.

²¹ Mianğöra jenöŋ börögöra kewö jimamğö osiza, “Ni göhöra qahö osizal.” Mewöyök nöropnöŋ könagöra “Ni göhöra qahö osizal,” mewö jimamğö osiza.

²² Simbisembel qahöpmö, sile kitipnini möringa lölöwöröŋi akzei, mienön qahöwaketka jebuk malbingö osibin.

²³ Sile kitipnini möringa qetbuŋanini eretŋi akzei, mi mönö esuhuinga qetbuŋaninambuk akze. Sile kitipnini möringa gamuŋinambuk akzei, mi mönö törörök esuhuinga ambazip jeŋine dop kölja.

²⁴ Sile kitipnini aukŋe kondelbingö gamu qahö mötzini, mi mönö qahö esuhuinga dop kölja. Mewö ahakzinmö, Anutunöŋ sile kitipŋi kitipŋi mindiriba jöhöm enğiba kitipŋi omanji mi qetbuŋa ketanji wanjiiga öröröŋ akze.

²⁵ Sile kitip yeŋön sutŋine jula anğururuk akepukmö, tandök mohot köyan köl anğumegöra mönö arengöiga öröröŋ akze.

²⁶ Sile kitip kunŋan sihimbölö mötzawi, tosatŋi pakpak mönö yambuk sihimbölö mörakze. Sile kitip kunöŋ qetbuŋa miwikŋaizawi, tosatŋi pakpak mönö yambuk söngaimakze.

27 Enjön Kraistkö ölnji akze aka mohot mohot enjön mönö yangö ölnjanjö sile kitipnji akze.

28 *Miangö dop Anutunöŋ al enjiiga urumelen könagesögö nup kewö memakze: Mutuk tosatnji kuŋgum enjiiga melaimelai azi aposol akze. Miangö andöŋe kambu yahötŋi kuŋgum enjiiga kezapqetok ambazip akze. Kambu karöbutŋi yeŋön böhi qaqazu akze. Miangö andöŋe tosatŋan aŋgöletot meme ambazip akze. Tosatnji yeŋgöra mötmöt kalem enjiiga kawölŋi kawölŋi mem ölöwahakze. Tosatŋan amqeba köhöiba tosatnji alabauk ak enjimakze. Tosatnji yeŋgöra kalem enjiiga galömkölköl nup memakze. Tosatŋan keu qainŋi kun jimakze.

29 Körek enjön mönö melaimelai azi aposol qahö akze. Saumbaŋ! Körek enjön mönö kezapqetok ambazip qahö akze. Körek enjön böhi qaqazu akze me qahö? Körek enjön aŋgöletot meme ambazip akze me qahö?

30 Kawöl mem ölöwakingö mötmöt kalemŋi kalemŋi mi körek enjören ahöza me qahö? Körek enjön mönö keu qainŋi kun qahö jimakze. Qahö. Keuŋi keuŋi qainŋi kun jigetka enjön mönö körek mi melenbingö amqeze me qahö?

31 Enjön mönö nup memegö mötmöt kalemŋi kalemŋi ölop sorokŋi mi buŋa qem aŋgubingöra awöweŋgömakŋe. Mewö awöweŋgögetka nöŋön köna qetpuk sorokŋi kondela miangö mötmöt kalemŋi mi kewö jim asarimam:

13

* 12:28: Ef 4.11

Jöpaköm anġuanġugö kalemġi

¹ Nöñön ambazip aka Suep garata yeñgö keuñi keuñi qainñi kun mianñön keu jiba malbilenakmö, urukalemnan qahö asuhuza, mönö töndup kewö akilenak: Goñ qegetka goñgoñ qeri anġötömualñi mörakzini me göjön (biret) uturukögetka kiñqororon qerakzawi, mönö mianġö dop akilenak.

² *Kezapqetok keu jijigö mötmöt kalemġi ahöm niñgiiga keu asa-asambötni pakpak mötpilenak aka keu pakpakö könañi möt yaköbilenak, mianñön mönö dopñe akza me qahö? Mi töndup urukalemnanġö ölñan qahö asuhuiga mewö mönö yuai omananök aka öne töhön malbilenak. Mötnarip köhöikñi kötökñi miwikñaiba mianġö qakñe kundunġö Toni jim kutubiga ölop tem köla kundunji qeköba kungen albawakmö, urukalemni qahö asuhuza, mewö töndup mönö yuai omananök aka öne töhön malbilenak.

³ Sukinapni pakpak ambazip wanapñi yeñgöra mendenġ engibilenak aka sileni tosatñan ohoget jemapköra tököm engibilenakmö, urukalemnanġö ölñan qahö asuhuza ewö, mianñön mönö qahö kötökñi bauköm niñgima.

⁴ Kunñan alañi uruñan jöpaközawi, yañön mönö urukönöpñi qahöpmö, urubönjöñ qakñe ala ak wañgimakza. Körogisigisi qahö möta yuainġgöra qahö köpösöñgömakza. Sileni qahö mem wahöta jakbak-örañbörañ qahö malja.

⁵ Ahakmemenan alañanġö uruñi qahö mem bölimakza. Nanñi ölöwakñamgörök qahö kapan kölakza. Uruqeqe ak wañgigetka urukönöp zilañ

* **13:2:** Mat 17.20; 21.21; Mak 11.23

qahö ahakza. Mem bölim wangigetka sihimbölö möröhi, mi qahö mötmörriba mosörakza.

⁶ Tosatñan bölöñi akzei, miangöra qahö söngaizapmö, keu ölni wuatangömakzei, mönö yembuk mohotñe söngaimakza.

⁷ Nalö dop alañi sel jöhöba qöhöröñe kin köhöiba möt narim wangimakza. Mewö me mewö asuhuiga Anutugö jörömqöröm aka al mamböta awösamakak kinda sihimbölö pakpak möta mökö söngömakza.

⁸ Urukalem ahakmeme mi nalö teteköñi qahö ahöm öngöma. Kezapqetok keu jiba keunji keunji qainñi kun jimakzei, mianön qahöwakña aka mötmöt qainñi kun mianön mönö mewöyök omani ak teköma.

⁹ Mötmöt qainñi kun mi bahösapsap möt yakömakzin aka kezapqetok keu mi bahösapsap jimakzin.

¹⁰ Bahösapsap ahakzinmö, Anutugö kalemñi kalemñi aködamunñinambuk asuhumei, nalö miangöreñ bahösapsap malmalninan mönö qahöwahiga oyaenköyaen siyonşayonji qahö malbin.

¹¹ Nöñön namande malali, nalö miangöreñ namande keu jiba malal. Urumötmötnan namande aiga miangö dopkeu kewöta mötmörriba malal. Azi ketañi aka miangöreñ namandegöreñ ahakmeme mi mosöta andö qeal.

¹² Miangö dop nalö kewöñe Anutugö aködamunñi mi ölop qahö ehakzin. Mi piliknöñ uba ehökö tandök ek bibihiba tandökñi törörök qahö möta öne mötmörimakzin. Mewö mötmörimakzinmö, könañgep Anutubuk mesohol köl anguba ek soroköbin. Nalö kewöñe mötmöt qainñi kun mi

bahösapsap möt yaközalmö, nalö mianğoreŋ mi mönö körek möt yaköm tekömam. Anutunöŋ ni möt kömum niŋgizawi, nöŋön mianğö dop yaŋgö könaŋamŋi möt kömum tekömam.

¹³ Keu ki jim köhöizin: Kalem karöbut mötnarip, jörömqöröm aka urukalem mi köhöiba ahöm öŋgömemö, urukalem ahakmeme mianğön mönö sutŋine öŋgöŋgöŋi akza. Mewö.

14

Kezapqetok keu aka keu qainŋi kun jijigö kalemŋi

¹ Urukalemğö könaŋi mönö wuatangöba malme aka nup memegö mötmöt kalem könaŋi könaŋi mi mönö buŋa qem aŋgubingö kapan köla malme. Mianğön ölöpmö, kezapqetok keu jijigö kalemŋi memingöra mönö köhöiba kapan köla malme.

² Kunöŋ keu qainŋi kun jizawaŋön mönö ambazip neŋgöra qahöpmö, mönö Anutugörök mi jimakza. Uŋa Töröŋan sölölohöiga keu asa-asamböŋi asuhui jimakzawaŋöra tosatŋi neŋön keu mi qahö möt asarim waŋgimakzin. Mönö nanŋanök bauköm aŋgumakza.

³ Tönpin maljinmö, kezapqetok keu jimakzawaŋön mönö ambazip urunini mem köhöiba naŋgöba urukölalep ak neŋgimangöra aka keu jimakza.

⁴ Kunŋan keu qainŋi kun jiba mianğön mönö nanŋi uruŋi möhamğöba köhököhöi mi-wikŋaimakzapmö, kezapqetok keu jimakzawaŋön mönö urumeleŋ könagesö pakpak urunini möhamğöba mem köhöim neŋgimakza.

5 Injini köreknan keu qainnji kun jimegöra mötzalmö, kezapqetok keu jimegöra mönö kapañ köla gwötpuk mötzal. Kezapqetok keu jimakzawañon mönö keu qainnji kun jimakzawi, mi ongitza. Keu qainnji kun jiba mi mianğöreñök nanine keunöñ melenjawı, mewö mönö öröröñ akzahot. Mewö aiga keuñan mönö urumelen könagesö urunini möhamğöba mem köhöim nenğiiga dop kölja.

6 O urumelen alaurupni, nöñon enğöreñ kaba keuñi keuñi qainnji kun jibileñak, mewö mönö denöwö mem ölöwak enğibileñak? Mewö qahöpmö, Anutugöreñ keu indelmam me mötmöt qainnji kun enğimam me kezapqetok keu jimam me goro kusum enğimam ewö, mianñon mönö mem ölöwak enğimam.

7 Awölop me gita kulele me yuai kunöñ liñetkö imbiñi miwikñaimakzini, mienñon mönö malmalñini qahöpmö, könañini mönö mewöñanök kewö ahöza: Kunñan awölop lañ uba me gita kulele lañ qeiga mianñon qetñini nanñök nanñök qahö miwikñaimakza ewö, liñetkö imbiñi mönö denöwö möt asaribinak?

8 Mewöyök tömun um böligetka qetñi törörök qahö möt asarizin ewö, dañon mönö bim qeqegöra jöjöröbawak?

9 Enğö könañinan mewöñanök ahöza: Nesil-amñinan ambazip qahö möt asarimeanğö dopkeu lañ jize ewö, kunñan keu mewöñi mönö denöwö möt asaribawak? Keu mewö jizei, mianñon mönö öne lañ luhutnöñ anakza.

10 Gölmeñi gölmeñi mianğöreñ keu murutñi murutñi dawik jimakzini, mi dañon mötpawakmö,

töndup körek mienön mönö keugö kõnaŋi möt asaribingöra aka ahöze.

11 Kõnaŋi mianğöra aka jimakzinmö, kunöŋ keu jiiga keuŋaŋgö kõnaŋi qahö mötzal ewö, nöŋön yaŋgö keuŋaŋgö kiannaŋi akiga yaŋön mewöyök nöŋgö keuŋaŋgö kiani akza.

12 Eŋgö kõnaŋinan mewöŋanök ahöza: Inini nup memegö mötmöt kalemŋi kalemŋi buŋa qem aŋgubingö awöweŋgögetka dop kölja. Mianğöreŋ mönö kalem kewöŋi membingöra kapaŋ köla malme: Mötmöt kalem urumelenj kõnagesö uruŋini möhamğöba mem köhöimakzei, mönö mi buŋa qem aŋguba nupnöŋ algetka qetpuk akŋa.

13 Mianğöra keu qainŋi kun jimakzawaŋön mönö kewö köuluköiga dop kölma, “O Anutu, keu jizali, mi melenj mangö mötmöt kalemŋi niŋgiman.”

14 Mianğö kõnaŋi kewö: Nöŋön keu qainŋi kun jiba köuluközal ewö, nöŋgö uŋanan keuyök jiba köuluközapmö, urumötmöt nan mönö ölni kun qahö miwikŋaiza.

15 Mianğöra mönö denöwö akiga dop kölma? Nöŋön mönö uŋananöhök qahöpmö, urumötmöt ni mewöyök mianğöreŋ ala köulukömakŋam. Linjet köla möpöseimakzali, mi uŋananöhök qahöpmö, urumötmöt ni mönö mewöyök mianğöreŋ ala kölakŋam.

16 Gi Anutu uŋagan möpöseim waŋgizan ewö, ambazip omaŋi kunŋan totoköŋine kaba tata möpöseizanaŋgö kõnaŋi qahö möt kutumawi, yaŋön mönö “Keu mi ölna,” mi denöwö jibawak? Wania jizani, yaŋön mi qahö möt asariba öne tönpin tatza.

17 Gi ölop Anutu möpöseizanzmö, keugan tosatnji yenjö urunini qahö möhamgöba mem köhöim enğiza.

18 Nöñön körek injini enğonğita keunji keunji qainnji kun mi gwötpuk jimakzali, mianğöra Anutu möpöseizal.

19 Anutu möpöseizalmö, urumelenj könagesö urunje ambazip kusum enğimangöra kapanj köla möt asarimeğöra keu jitnji 5 jimangö mötpi ölnji akza. Keunji keunji qainnji kunöñ keu jitnji 10.000 nananğörök jimangö mötpi eretnji akza.

20 Urumelenj alaurupni, injini keu kewöta mötmörimakzei, mianğoreñ mönö namande tandök mosöta ambazip ketanji yenjö dop mötmöriba malme. Bölöñji akin jigetka mianğoreñ mönö morösepep ewö aka osimemö, mötkutukutunjan mönö ambazip ketanji aka malme.

21 *Mosegö Köna keunöñ keu kun kewö ohoget ahöza,

“Nöñön kian ambazip kunğum enğibiga könagesö kienğoreñ kaba jitninan keu tandökñi kun jigetka lañ welipkömakñemö, mi töndup nöñgö keuni qahö mötme. Kembu nöñön mewö jizal.”

22 Keu mianğö dopkeu qainnji kun jiinga urunini qahö melenget yenjön mötketka Anutugö aiwesökñi ak enğizapmö, mötnarip ambazip nenğöra mianjön mönö aiwesökñi kun qahö akza. Mi qahöpmö, kezapqetok keu jiinga mianjön mötnarip ambazip nenğöra Anutugö aiwesökñi akza. Urumelenğö kopa yenjön mi mötketka Anutugö aiwesökñi kun qahö ak enğiza.

* 14:21: Ais 28.11-12

²³ Urumelenj könagesö enjön tokoba körek enjön keunji keunji qainnji kun mianğoreñ jigetka tosatñan Buña keu qahö kusum enğigetka uruñini qahö melenđa öne mianğoreñ öngömei, yeñön mönö auruba kewö jibeak me qahö, “Nöröpñinan mönö sohoi kahalalom akze.”

²⁴ Mewö jibeakmö, körek enjön kezapqetok keunji keunji jigetka kunñan Buña keu qahö kusum wañgigetka mötnariñji qahö öne totokonjine öngöma ewö, körek enjön mönö singisöndokñi indela uruñi qahö melenñohañgö keunji jim tekögetka könañamñi möt kutuiga aukñe asuhuma.

²⁵ Uruñañgö keu tölapñi tölapñi aukñe asuhuiga yañön mönö dapköba eta Anutu waikñi memba möpöseiba kewö jim miwikñaiba qetma, “Anutunöñ ölña enğö sutñine malja.” Mewö.

Urumelenj totokogö areñi kewö:

²⁶ O urumelenj alaurupni, mewögöra nini mönö denöwö jiinga dop kölma? Injini Buña keugö tokomakñei, mianğoreñ mohot mohot enjön mönö körek areñini kun me kun mi kewö ahakñe: Kunöñ Buña liñetkö areñi aliga kunöñ Buña keu kusum enğiiga kunöñ Anutugö goro dölöknji indeliga kunöñ keu qainnji kun jiiga kunöñ mi melenma. Areñ pakpak mi mönö urumelenj könagesö urunini kunğuguet köhöibingöra aka ahakñe.

²⁷ Tosatñan keu qainnji kun jime ewö, ambazip 4 qahöpmö, yahöt me karöbut yeñönök mönö totoko mohotkö uruñe mewö jime. Yeñönök mönö areñinañgö dop awatanj jigetka kunñan mi melenma.

28 Kunñan keu melenmamgö dop qahö akza ewö, yeñön mönö urumelen könagesögö totokonöñ keu bök tata nanñinanğörök keuñini qainñi kun jigetka Anutunöñ mötma.

29 Kezapqetok ambazip yeñgöreñök yahöt me karöbut yeñgörök mönö areñ engigetka keu jigetka tosatñan mönö keuñini kewötme.

30 Mewö akñemö, kunñan totokonöñ tariga Anutunöñ goro keu uruñe indeli mötza ewö, yeñön mönö mi jiiga kezapqetok keu mutuk jizawañön keuñi mosöta bök tatma.

31 Ambazip körekñan Anutugö goronji mötketka uruñini nanğöi ölöwakñegöra inñini mönö körek pakpak ölöp nalöñini memba areñinanğö dop kezapqetok keu jime.

32 Kezapqetok ambazip yeñön mönö ölöp uñañini galöm kölgetka uñañinan keu bapñe anjeañgö dop akze.

33 Anutunöñ kizik-kazuk Toñi qahöpmö, luai Toñi akza. Mianğöra totokonñini mönö areñnöñ wuatañgöba ahakñe. Ambazip sarakñi yeñgö sutñine könagesö dop ahakzei, inñini mewöyök mönö mianğö dop kewö ahakñe:

34 Ambi eñön mönö urumelen könagesögö totokonñine keu bök tatme. Yeñön keu jimeañgö dop qahö akzemö, Köna keu ahözawañgö dop mönö keu bapñe anda malme.

35 Ambinöñ urumelen könagesögö keu jim kutuba kusum enñiiga qahö dop kölja. Mianğöra keu kungö könañi mötpingö mötze ewö, yeñön mönö mirinñine anda tata nanñini apurupñini qesim enñime.

³⁶ Anutugörej Buña keu mianön mönö engö sutñineyök ahuyök me qahö? Keu mianön ahuba sehiba mala engörej kaba engö bunayök akza me qahö?

³⁷ Kunöñ kewö jibawak, “Nöñön kezapqetok keu jibiga Uña Töröñan sölölohöm ningiiga keu miambuk urumohot qahö akzal.” Mewö jizawañön mönö keu ki möt yaköma: Nöñön ambigöra keu ohom engizali, mianön mönö Kembugö jöjöpañ keu akza.

³⁸ Kunñan keu miangö kezap qahö ala silebile malja ewö, inini mönö azi yangö keugö kude kezap al wangiba malme.

³⁹ Miangöra urumelen alaurupni, inini mönö kezapqetok keu jibingöra awöwengöba malme aka keu qainñi kun jimegö songonji mi kude alme.

⁴⁰ Mi kude almemö, yuai pakpak mönö törörök areñ ala wuatangöba ahakñe. Mewö.

15

Kraistnöñ kömupnöhök wahörök.

¹ O urumelen alaurupni, nöñön Ölöwak Buña jim asarim engjali, mi ölum engubapuköra mönö köl gulim engimam. Inini mi buña qem anguba mötnaripñini miangörej ala töndangöba kinje.

² Nöñön Ölöwak Buña jim asarim engjali, inini mi miangö dop töp memba angön kölme ewö, mi-añön mönö mem letot engiiga Suepkö bunaya akñe. Mewö qahö akñe ewö, uruñini mönö öne töhön melenja malje.

³ *Nöñön keu tosətñi pakpak görañe ala nanak Buña keu möt aŋgön kölali, mi mötpi öngöiga miangö keu kötni mötmegöra mi kewö enġial: Kraistnöñ mönö Buña Kimbi ahözawaŋgö dop neŋgö siŋgisöndokninaŋgöra aka kömuyök.

⁴ *Kömuiga Buña Kimbi ahözawaŋgö dop löm kölgetka sömañi karöbut aiga kömupnöhök wahörök.

⁵ *Kömupnöhök wahöta Pitögöreñ asuhuyök aka miangö andöñe gwarekurupñi 12 yeŋgöreñ asuhuyök.

⁶ Miangö andöñe nalö mohot miangöreñök urumeleñ alaurupnini qötöñini 500 öngiröhi, mönö yeŋgöreñ asuhuyök. Yeŋgöreñök ambazip ölni yeñön toroqeba nalö kewöñe mewöyök maljemö, tosətñan lök kömuget.

⁷ Miangö andöñe munñi Jeimsgöreñ asuhuyök aka miangö andöñe aposol pakpak yeŋgöreñ asuhuyök.

⁸ *Mieŋgöreñ körek asuhubagun qöndökñi mönö nöŋgöreñ mewöyök asuhuyök. Nöñön aposol mi asai ewö öröpköba aluñi asuhuyal.

⁹ *Miangö könäñi kewö: Nöñön aposol yeŋgö sutñine mötpi eriga dagibezupñini akzal. Anutugö urumeleñ könagesö sesewerowero ak enġiba malali, miangöra nöŋgö qetni aposol qetketka mötpi gamuñambuk akza.

¹⁰ Gamuñambuk akzapmö, nalö kewöñe yuai akzali, mi mönö Anutugö kalem möriamñan mem

* 15:3: Ais 53.5-12 * 15:4: Sum 16.8-10; Mat 12.40; Apo 2.24-32

* 15:5: Mat 28.16-17; Mak 16.14; Luk 24.34, 36; Jon 20.19 * 15:8:

Apo 9.3-6 * 15:9: Apo 8.3

letota nam köl niŋgiiga maljal. Yanön kalem möriamŋi niŋgiiga liklak qahö akiga eta qeba omaŋi qahö ahökmö, nöŋön mönö aposol körek luhut al engiba köhöiba nup memba malal. Mi nanak qahöpmö, Anutugö kalem möriamŋan mönö inahöm niŋgiiga nupnaŋgö ölni mewö asuhuba sehiyök.

¹¹ Nöŋön meali me yeŋön megetka ölni asuhuyöhi, mi muat. Neŋön mönö Ölöwak Buŋa keu mewö jim asarimakzin aka inŋini mianŋgö dop uruŋini melenŋa Kraist möt nariba malje. Mewö.

Nini kömupnöhök denöwö guliba wahötpin?

¹² Mötket! Kraistnöŋ guliba kömupnöhök wahöröhi, yanŋö könaŋi mewö jim asarimakzin ewö, engöreŋök tosatŋan mönö denöwö aka kewö jimakze, “Kömukömuŋi yeŋön qahö guliba wahötme.”

¹³ Mewö jimakzemö, kömukömuŋi yeŋön qahö guliba wahötpeak ewö, Kraistnöŋ mönö mewöyök qahö guliba mal köhöibawak.

¹⁴ Anutunöŋ Kraist qahö mem guli kömupnöhök wahötpawak ewö, nini Buŋa keuŋi mi jim asarimakzini mi omaŋi akawak. Mi möt narigetka mianŋön mewöyök pömsöm qeba omaŋi akawak.

¹⁵ Anutunöŋ ölna kömukömuŋi qahö mem gulim engi wahötpeak ewö, Kraistnöŋ mönö mewöyök qahö mem guli wahötpawak. Nini mi töndup Anutugö könaŋi kewö naŋgöba jimakzin, “Anutunöŋ mönö Kraist mem guli kömupnöhök wahörök.” Keu mi ölni qahö akawak, ambazipnöŋ mönö mianŋöra aka könaŋamnini miwikŋaigetka munenŋi aiga ölöp nöŋgöra kewö jibeak, “Anutugö könaŋi

mönö naŋgöba jim sohomakza.” Keu mianjon mönö gamuŋamjuk akawak.

16 Anutunöŋ kömukömuŋi qahö mem gulim enġii wahötme ewö, Kraistnöŋ mönö mewöŋanök qahö guliba wahötpawak.

17 Anutunöŋ Kraist qahö mem gullii wahötpawak ewö, inġini mönö öne töhöntöhön möt narim waŋgiba toroqeba siŋgisöndokŋinaŋgö kösöġwarönöŋ malbeak.

18 Mewö aiga alaurupninan Kraistpuk qekötahöba kömugeri, yeŋön mönö mewöyök sohoba könöp siagö buŋaya akeak.

19 Nini Kraist jörömqöröm ak waŋgiba gölmenöŋ malbinaŋgö dop galöm köl neŋġii miangöreŋ tekömapköra mambötzin ewö, nini mönö ambazip tosatŋi pakpak enġoŋgita bapŋine geba öngöpŋi daböŋi malinga körekŋan wösö mötmöt ak neŋġimakzeanġö dop akinak.

20 Mewö akinakmö, Kraistnöŋ mönö ölŋa guliba kömukömuŋi yeŋgö jitre memenġini aka kömupnöhök wahörök.

21 Miangö könaŋi kewö: Azinöŋ kömup kondoriga asuhui könahiba kömumba mala korin. Kömumba malġinaŋgöra aka azi kunŋan kömumba guliba malmal köhöikŋi kondoriga asuhuyök. Miangöra nini körekŋan mönö mewöyök guliba kömupnöhök wahötpin.

22 Körek neŋön Adam ewö aka kömumbini, mewöŋanök Kraistpuk qekötahözini, Anutunöŋ nini körek mal köhöibingöra mem gulim neŋġima.

23 Mem gulim neŋġimapmö, körek neŋön mönö Anutunöŋ nalö alöhaŋgö dop guliba wahötpin.

Kraistnõj jitnememenini aka guliiga miangö andõje yangö buñañi akzini, neñõn lilingöba kaiga nalö miangörej guliba wahötpin.

²⁴ Kraistnõj mönõ lilingöba kaba ömewöröme pakpak gölme dop ösum-mumu qakñe galöm kölakzei, miengö kukñini memba et ala ösumñini körek köndenma. Mi köndenja bemptoñi Anutu Iwigö börõje aliga gölmenõj malmal miangörej teköma.

²⁵ *Kraistnõj galöm köla mal öngöiga Anutunõj Buña keu ahözawangö dop “mönõ kerökurupñi körek luhut ala nanñi köna bapñe al engima.” Kraistkö galömkölköl nupñan mönõ miangörej teköma.

²⁶ Kerökurupñi luhut al engiiga miangörej kömup Toñan mönõ qöndökñi aiga memba et al wangima.

²⁷ *Miangö könañi mi Buña Kimbinõj kewö ahöza, “Anutunõj mönõ yuai pakpak yangö köna bapñe ali ahöza.” Keu mewö ahözapmö, “Yuai pakpak ali ahöza,” keu mewö jiiga könañi mönõ aukñe kewö ahöza: Anutunõj yuai pakpak Kraistkö bapñe ali ahöiga nanñi mönõ qahö memba eta Kraistkö bapñe al anguyök.

²⁸ Mewö qahöpmö, Anutunõj yuai pakpak Nahönñangö bapñe aliga galöm köla kerökurupñi pakpak nanñi kukösumñangö bapñe al engima. Mi teköiga miangörej Anutunõj mönõ Nahönñi mewöyök nanñi kukösumñangö bapñe ala galöm köl wangima. Mewö aka Anutunõj yuai pakpakö Kembuñi ak teköba mal öngöma.

* 15:25: Sum 110.1 * 15:27: Sum 8.6

29 Keu kun kewö: Ambazip tosatñan urunini qahö melenja öne kömugeranğöra tosatñan kömukömuñi mi bauköm engimeğöra jiba salupñini aketka dumñe kunbuk o melun mem engimakze. Kömukömuñi yeñön qahö guliba wahötpeak ewö, yeñgö nup ölñan mönö denöwö asuhubawak? Anutunöñ kömugeri, mi qahöpmahöp mem gulim engii wahötpeak ewö, ambazip mewöñan mönö denöwögöra aka jigetka yeñgö salupñine o melun mem engimakze? Nupñini mi mönö öne membepuk.

30 Kömumba qahö wahötpinak ewö, neñön mewöyök mönö urunini Anutugö nupnöñ qahö ala jöhöbinak. Anutugö nupköra aka kömumbinbukö lömböt bapñe sundan qahö anda malbinak. Qahö.

31 Kömupnöñ mönö nalö dop gwahöt ningimamgö dop akza. Keu mi ölña. O urumelenç alaurupni, nöñön Kraist Jisös Kembunini yambuk kinda engöra aka sileni memba öngömakzali, miangö dop-keu ölñi mi aukñe jibi mötmegöra mötzal.

32 *Nani imbi-imbi wuatangöba nup ki memamgö mötmörize ewö, yuai kianñön mönö denöwö bauköm ningima? Mewö qesim engibiga mi mönö mötmöriba melenje: Nöñön Efesus siti kianğoreñ ambazip ubibi kanjamñinambuk ewö miwikñaiba kömumbilençbuköra yembuk auba malal. Mönö tötböröm aka auba malal. Kömumbagun qahö guliba wahötpini, mewö mönö qahö aubilençak. Qahö! Mewö aiga ölop tosatñi yembuk kewö jibilençak, “Uran kömumbinanğöra mönö ölop nene sösongai ala o köhöikñi nempa malbin.”

* 15:32: Ais 22.13

³³ Janjuŋ kude akŋe. “Ambazip bölöŋi yembuk köisirik tatketka ahakmeme ölopŋan bölüma.” Keu kun mewö ahöza.

³⁴ Engö sutŋine tosatŋan Anutu qahö möt waŋgizei, mianğöra gamuŋini mötmegöra mi jizal. Mianğöra mönö gukmaulemŋini mosötme. Imbiŋinan letoriga törörök möta siŋgisöndok kude toroqeba ahakŋe. Mewö.

Sileninan guliba wahöta tandökŋi kun akŋa.

³⁵ Kunöŋ kewö qesibawak, “Anutunöŋ kömükömuŋi mi denöwö mem gulim engii wahötme? Sileninan mönö tandök denöwö meleşniga asuhume?”

³⁶ Mewö qesibawak, mönö uruqahö keuya jibawak. Inini sehoŋ kötŋi qahö kömuıga öne qesiŋ gilme ewö, mianğön mönö qahö jula wahötma.

³⁷ Kötnaŋgö ipŋi wahötmawi, mi qahö kömötzanmö, kötnanök qesiŋ giljan. Wit me sehoŋ kötŋi me kötŋi tosatŋi gilakzan.

³⁸ Miyök gilakzanmö, Anutunöŋ mönö sihimnaŋgö dop ipŋi waŋgima. Kötŋi tandökŋi nanŋök nanŋök mi nanŋini ipŋi engimakza.

³⁹ Yuai busuŋini mi tandökŋini mohot qahö. Ambazip busuŋini nanŋök, sömbup busuŋini nanŋök, nei busuŋini nanŋök aka söra busuŋini mi nanŋök.

⁴⁰ Mianğö dop Suepnöŋ malmalgö sile mi nanŋök akza aka gölmenöŋ malmalgö sile mi nanŋök akza. Nanŋök nanŋök akzahotmö, Suep silegö aködamuŋi mi gölme silegö aködamuŋi oŋgita qainŋi kun akza.

⁴¹ Wehöngö asakmararaŋi mi nanŋök, köiŋgö asakmararaŋi nanŋök aka seŋgelau miŋgö

asakmararaŋini mi nanŋök. Senġelau asarigetka tosatŋi mienġö asakmararaŋini mi senġelau tosatŋi mienġö asakmararaŋini oŋgirakza.

⁴² Guliba kömupnöhök wahötpini, mianġö könaŋan mönö mianġö dop ahöza. Sile löm kölbini, mianġön gisahöba qahöwakŋapmö, Anutunöŋ mi mem guli wahötmawi, mianġön mönö qahö kömuma.

⁴³ Sile löm kölbini, mianġön lölöwöröŋi aködamunŋi qahö akzapmö, Anutunöŋ mi mem guli wahöta mianġöreŋ mönö köhöikŋi aka asakmararaŋambuk akŋa.

⁴⁴ Sile löm kölbini, mianġön gölmenöŋ malmalgö sileya akzapmö, Anutunöŋ mi mem guli wahöta mianġöreŋ mönö uŋa mire malmalgö sileya akŋa. Gölmegö sile ahöza ewö, mianġö dop uŋagö silenŋi mi mewöyök ahöza.

⁴⁵ *Mianġö keuŋi mi Buŋa Kimbinöŋ mewöyök kewö ohoget ahöza, “Azi mutukŋi Adam yaŋön letota uŋaŋi miwikŋaiba söŋgörö ösumŋi öröba malmalŋambuk ahök.” Keu mi möringa likepŋi kewö asuhuyök: Adam qöndökŋan mönö memguliguligö uŋaŋi ahök.

⁴⁶ Uŋagö yuainŋi mi mutuk qahö asuhuyökmö, gölmegö yuainŋi mianġön mönö mutukŋi akza. Uŋagö yuainŋan mönö mianġö andöŋe asuhuyök.

⁴⁷ Anutunöŋ azi mutukŋi sömsömnöhök miwikŋaiiga gölme azia asuhuyök. Azi könaŋgepŋi yaŋön mönö Suepnöhök eta sutnine asuhuyök.

⁴⁸ Gölme ambazipnöŋ azi gölmenöhök asuhuyöhi, mönö yaŋgö dop akze. Suepkö buŋa akzinaŋön azi Suepnöhök eta asuhuyöhi, mönö yaŋgö dop akzin.

* 15:45: Jen 2.7

49 Nini gölme azi mutukɲaŋgö kaisoŋgolomɲi memba maljini, mianḡö dop Suep azigö kaisoŋgolomɲi mi mewöyök memba malbin. Mewö.

50 O urumelen alaurupni, nöŋön keu kewö jibi mötme: Sep busuninan mönö Anutugö bemtohoŋ uruŋe aŋgota dum memegö dop qahö. Mi osimahot. Sile kianön gisahöba qahöwakɲawi, mianön mönö oyaenƙoyaen qahö akɲa. Suepkö dum qahö ayapkömawi, sile kianön mönö mi memangö osima.

51 *Mötket! Nöŋön keu tölapɲi kun kewö indelmam: Körek neŋön mönö qahö nöŋ qeba kömumbin. Qahöpmö, kömukömuɲi yeŋön letotketka tosatɲi neŋön mönö sileninambuk letotpin.

52 Anutunöŋ kömukömuɲi mem gulim enḡiiga tömun qainɲi kun qöndökɲan qeriga mianḡöreŋ wahötketka neŋön biliksik aliga wölaŋök letotpin. Mutuk kömugeri, yeŋön mönö kunbuk qahö kömume.

53 Sep busu ki gisahöba qahöwakɲawi, mianön mönö letota qahö ayapkömawaŋgö dop akɲa. Sile ki kömumawi, Anutunöŋ mi mönö opo ewö qeköba mianḡö salupɲe sile qahö kömumawi, mi neŋgii memba maluku ewö löŋgötpin.

54 *Mewö akzapmö, letotletot mi ak teköiga silenini qainɲi kun meinga qahö kömumba gisahömawi, nalö mianḡöreŋ mönö söŋgaibin. Buɲa Kimbinöŋ keu ohoget ahözawi, mianön mönö öljambuk aiga mianḡö dop kewö jime, “Yaŋön

* 15:51: 1 Tes 4.15-17 * 15:54: Ais 25.8

mönö kömup Tonji köndenḁa luhut aliga köiran aljin.”

55 *Keu miangö alaḁi kun kewö, “O kömup Tonji, göḁön mönö luhut almanangö dop qahö. O kömup Tonji, göhöreḁ lḁgip jitḁi miangön mönö nenḁöhömangö osima.”

56 Keu mewö ahözapmö, kömupkö lḁgip jitḁi mi siḁgisöndok ahakmeme. Jöjöpaḁ keuḁan mönö siḁgisöndok akinbukö soḁgo aliga töndup aḁinga kukḁambuk ahakza.

57 Kukḁambuk ahakzapmö, Kembunini Jisös Kraistnöh mönö Anutugöreḁ bohon köliga alabauknini aiga yaḁgöra aka luhut ala malbin. Miangöra “Anutu saiwap!” jizal.

58 O wölböt alaurupni, luhut albinangöra eḁön mönö kin köhöiba anjanbanjan mosöta uruḁini kude öḁgöba eta ahakḁa. Kembugöreḁ qekötahöba nupḁi megetka öḁḁan mönö eta omaḁi qahö akḁa. Mi möt yaköba Kembugö nupḁi mi mönö urukönöp* qakḁe böḁ qeba pöndaḁ memba malme. Mewö.

16

Jerusalem alabauk enḁimegö jimkutukutuḁi

1 *Judia könagesö sarakḁi yengöra alabauk moner tokomegöra qesim niḁgigeri, miangöra kewö jim kutum enḁizal: Nöhön Galesia prowinsgö urumeler könagesöhḁi könagesöhḁi jim kutum enḁiali, eḁön tok mönö miangö dop kewö ahakḁe:

* 15:55: Hos 13.14 * 15:58: Urukönöp mi Kembugöreḁ öḁöḁangöra jiza. Urukönöp böḁöhḁi mi qahö. * 16:1: Rom 15.25-26

² Sonda dop wehön mutukñi miangörej injini körek nanjök nanjök mönö naluk alakñe. Töhötmöriam memakzeangö dop monenini bahöñi mi köweñini görañe ala galöm köla malme. Mewö aketka nalö engörej kabiga miangörej naluk sangabañga almeangö dop qahö akñemö, mi ölop köweñineyök memba altanöñ alme.

³ Mewö aketka engörej kamami, nöñön nalö miangörej ölop jim-asa-asari kimbi ohoba azi nup miangö mötket dop köljawi, mönö yeñgö böröñine ala melaim engibiga mindimindiri kalemñini mi memba Jerusalem anme.

⁴ Nöñön yembuk mohotñe anmamgö anmam ewö, yeñön mönö ölop nömbuk toroqeba mohotñe köwet kutuba anbin. Mewö.

Polgö nupñangö aka köna anangö areñi

⁵ *Nöñön Masedonia prowins ongita anmam. Miangöra Masedonia mosötagun mönö engörej kamangö mötzal.

⁶ Engörej kaba nalö tosatñi embuk tatpilenjak me kömunjan kie nalöñi (winter) mi mewöyök engö sutñine toroqeba mal teköbilenjak. Mewö malbi ölop bauköm niñigetka denike denike anbilenjak, miangörej mönö amqeba köna toroqeba anmam.

⁷ Nalö kewöñe engörej kaba kusukñanök engeka engongita anmamgö qahö mötzalmö, Kembunöñ on jima ewö, mönö nalö tosatñi embuk tatmamgö jöjörözal.

* **16:5:** Apo 19.21

8 **Mewö jöjörözalmö, mutuk Efesus siti kianğoreñ toroqeba malbi yambu jenjiqueqe dölökñi (pentekost) mianğön kam kuñguma.

9 Anutunöñ nöñğöra nupkö nanğunji ketanji öröi ölop nup ketanji membi ölnji asuhum sehimakzapmö, gwötpukñan tuarenjon ak niñgimakze. Mianğöra kianğoreñ toroqeba malmamgö mötzal.

10 *Timotinöñ ni ewö Kembugö azi ipñi aka nupñi memba malja. Mianğöra yañön engöreñ kama ewö, inñini mönö köyan köl wañgigetka keñgöt mötmötñi qahö engö sutñine malma.

11 Kunñan kun kude ek sirik kölmapmö, embuk mal teköba nöñğoreñ kamamgö jimawi, mianğoreñ mönö bauköm wañgigetka luainöñ engömosöta lilingöba kama. Nöñön urumelen alaurup yembuk i ekingö mambötzin.

12 Urumelen alanini Apolos yañgö keunji kewö jimam: Yañön urumelen alaurup yembuk engöreñ kameğöra jiba köhöikñanök uru kuñgum wañgial. Mi wañgialmö, nalö kewöñge engöreñ kamamgö tököm köhöiza. Könañgep nalöñi ölop ahöm wañgimawi, mönö mianğoreñ kama. Mewö.

Yaizökzök keu teteköñi

13 Inñini mönö uruguliguli mala mötnariññini köl guliba kin köhöiba malme. Azi köhöikñanğö dop mönö urugö nanğönañgö ambazip aka Kembugö kukösumñambuk kinme.

14 Yuai pakpak aka memei, mi mönö urukalemnöñ aketka asuhuma.

* **16:8:** Lew 23.15-21; Dut 16.9-11 * **16:8:** Apo 19.8-10 * **16:10:** 1 Kor 4.17

15 *Stefanas yangö mire maljei, injini mi möt engize. Akaia prowinsnöj nup meinga uruñini melengetka nupninañgö ölni mutukñi mewö asuhuyöhi, mötze. Yeñön ambazip sarakñi mi pöndañ welen qem engiba uruñini miangören jöhöba ala maljei, mi mötze. O urumelen alaurupni, nöñön uruñini kewö kuñgum engizal:

16 Injini tok ambazip mewöñi aka yembuk toroqeba nup mohotje memba Anutu welenni qemakzei, mönö körek yeñgö keuñini bapje anda malme.

17 Nöñön Stefanus Fortunatus aka Akaikus ki kagerañgöra söngaimakzal. Injini nömbuk Efesus ki qahö malgetka yeñön mönö engö salupñini aka köisirik ak niñgigetka dop kölja.

18 Yeñön engö uñani körö-ölöwak qeba maljei, miangö dop mönö nöngö uñani mewöyök körö-ölöwak qem niñgiba malget. Miangöra injini mönö azi mewöñi yeñgöra mötket öngöiga mi aukñeyök jiba keuñinañgöra törörök kezap ala malme.

19 *Urumelen könagesöñi könagesöñi Eisia prowins kiangören maljei, yeñön mönö yaizözköñini algetka engören kaza. Aqila Prisila aka urumelen könagesö yetkö mire tokomakzei, yeñön mönö Kembugö qetje yaizözköñini gwötpuk algetka engören kaza.

20 Urumelen alaurup pakpak Efesus ki maljei, yeñön mönö yaizözköñini algetka engören kaza. Injini mönö urumelen alaurupñini yembuk jölöñini jiba anğum anğuba numbuñini yöhötüm nembra malme.

* 16:15: 1 Kor 1.16 * 16:19: Apo 18.2

²¹ Nani yaizözkökni engöreŋ ala qetni nani börönan kewö ohozal: Pol.

²² Kunŋan Kembu qahö jöpaköba urukalem qahö aka malja ewö, Kembunöŋ mönö qesuakŋi yaŋgö qakŋe ali öngöma. Kembunini, gi mönö kanöŋ!

²³ Kembu Jisösgö kalem möriamŋan mönö embuk ahöma.

²⁴ Kraist Jisösbuk gekötahöba kinjei, nöŋgö urujöpaknan mönö körek embuk ahöba kötuetköm enŋii malme. Keu mi öŋa. Mewö.

Burum-Mindik Bible
The New Testament and portions of the Old Testament
in the Somba-Siawari language of Papua New Guinea,
also called the Burum Mindik language.
Sampela hap Buk Baibel long tokples Burum Mindik
long Niugini

Copyright © 1992, 2002 The Bible Society of Papua New Guinea

Language: Burum-Mindik or Somba-Siawari (Somba-Siawari or Burum-Mindik)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-22

PDF generated using Haiola and XeLaTeX on 18 Apr 2025 from source files dated 31 Aug 2023

c0871260-68cc-5a50-953f-52200e105d1e